
محمد عنانى

حلاوة يونس

ومسرحيات أخرى

١ - حلاوة يونس

٢ - انت فين يا بابا

٣ - قصة منزل

٤ - تحت التشطيب



الهيئة المصرية العامة للكتاب
١٩٩٣

تصميم الغلاف :

نجوى شلي

الإخراج الفني والتنفيذ :

صبري عبد الواحد

تصدير

هذه أربع مسرحيات من نوات الفصل الواحد ، رغم عدم التزامها بوحدة الزمان التي عادة ما تراعى فى هذا اللون من المسرحية (وإن كان بعض الكبار لا يراعونها مثل يوجين أونيل وغيره) ولذلك فربما كانت نوعاً مختلطاً من المسرحية التلفزيونية والمسرح التقليدى ، وإن كنت أتصورها جميعاً أحداثاً على خشبة المسرح لاعلى الشاشة .

وفى كل منها ما يربطه بفن المسرح وفن القصة القصيرة فى نفس الوقت وهو الشخصية الرئيسية التى تدور حولها الأحداث بل وتتبع منها ، مما يجعل وحدة الزمن قيماً يفترق إلى الدلالة الحقيقية .

وقد كتبت المسرحيات الثمانية نوات الفصل الواحد - ليلة الذهب ، ولا فى أمريكا ، جه عليه الدور ، نهايته ، حلاوة يونس ، تحت التشطيب ، قصة منزل ، أنت فى يابا ؟ والمسرحية الطويلة السادة الرعاع - فى باريس أثناء

مقامى الاجبارى للعلاج من مرض عياء ، وقد استطعت فى
شتاء ١٩٩٢ - ١٩٩٣ أن أنتهى منها جميعاً فى صورتها الأولى
ثم أخذت فى مراجعتها وتنقيحها بل وإعادة تشكيل بعض
أجزائها طوال صيف ١٩٩٣ حتى اتخذت هذا الشكل
المضغوط، وأعتقد أننى لو بذلت الجهد اللازم فى صياغتها
لطالت فأمعنت فى الطول لأنها منسوجة من مادة أكبر مما
تتحمله المسرحية ذات الفصل الواحد بصورتها التقليدية .
أرجو أن يمد الله فى عمري حتى أعود إلى بعض
موضوعاتها فأعالجها العلاج المتأنى الجدير بها .

محمد عنانى

القاهرة - ١٩٩٣

حلاوة يونس
مسرحية من فصل واحد

(عندما يفتح الستار نرى مجموعة - الراضح أنهم
من فقراء الناس يجلسون على بنشات خشبية أو
يقفون ثم يجلسون ويتشابهون ، من مختلف الأعمار -
رجال ونساء - ثم بعد فترة صمت يفتح الباب إلى
اليمين ويدخل شرطى معه قائمة بأسماء البعض -
يقرؤها فينفضون ويخرجون جميعا بينما يحاول بعض
الجالسين استرعاء انتباهه دون هدوى)

الشرطى : محمد بن عبد النبى .. نفيسة زينهم .. فوزية
فرقور .. اتفضلوا .. اتحركوا اعملوا لكم همه ..
دهدى .. أنتى ياولية أنتى أسمك إيه ؟
سعدية : سعدية ياخويا .. يسعدك ولا يورينا فيك يوم ..
الشرطى : يا خلق الله ! وجاية معانا ليه ؟ أنا قرئت
أسمك ؟

سعدية : أيوه يا خويا قدام الجدعان دول كلتهم ..

مسعود : معلش يا شاويش .. يمكن سمعها تقيل والا حاجة !

الشرطي : وهى عينتك محامى عليها ؟ أخرس خالص فاهم .. وانتى أنبلى لحد ما حد يطلبك ..

(يتجه نحو الباب مع الثلاثة بينما

تتابعه نداءات الجالسين)

سعدية : ما تتأخرش على يا خويا يكفك شر الضرورة

يونس : (وهو غلام) انت وقعت النوبة بتاعتك يا شاويش ..

الشرطي : آل يعنى الأمانة واكله بعضها ! امشى أنجر جاك خابط ..

مسعود : احنا بقى لنا ياما والدنيا ليلت ..

سعدية : وأهالينا ما يعرفوش احنا فين ؟

الشرطي : أستغفر الله العظيم يارب ! ياولية عيب كده

أحسن والله ما يحصل طيب .. هُم أهاليكو

دول موش متعودين ييجوا ياخدوكو من الباب

العمومى ؟ والا دى أول مرة تشرفونا

وتأسونا ؟

سعدية: قصى -

الشرطي : اخرسى ! اسمعوا ! أنا عندى شغل ويمكن

أطول شوية .. قسما عظمًا لو رجعت لقيت حد

اعتدى على حد لأفتح دماغه ! مفهوم يالمامة

ياحوش .. سلامو عليكم ! (يخرج)

مسعود : المرة دى حنطول معنتها فيها بيات !
سعدية : يادى اليوم الأغبر .. كان مالى أنا ومال النابت
.. أنا ماكت فى حالى .. لازم أتفلحس وأقول
لهم شفت وماشفتش ؟
مسعود : أهوئنت تبّع النابت ؟ دانتي موش خارجة واصل!
وقعتك مطينة بطين ..
سعدية : إيه ياخويا كفى الله الشر ؟ اشمعنى بتوع
النابت ؟ !
مسعود : كاتبين فى الجرايد إنهم لقوا فيها حاجات
علىرى قوى .. والظاهر إن فيها كبار من
إياهم ..
يونيس : هو بتاع الحلاوة حيچى إمتى ياعم مسعود ؟
أنا عايز حنة !
مسعود : شوف يابنى يا حبيبى .. هنا ما بيبيعوش
حلاوة .. وأحسن لك تنسى الكلمة دى ..
أحسن لها معنى كبير قوى هنا .. فاهم
ياشاطر ؟
يونيس : ما احنا كنا بنبيعوا تحت الشباك من برة
للضيوف هنا .. عمر ماحد قالنا حاجة ؟
عتريس : (يفتح عينيه بتثاقل) أنا عجبتنى حكاية
الضيوف دى قوى !
مسعود : كنتو بتقولوا عليها إيه من برة ؟
يونيس : اللى عسلية .. واللى سمسمية .. حسب
الموجود

مسعود : ماشى .. سميها كده دلوقتى .. واحنا لسه ما
تأخرناش .. دلوقتى بييجى إلكى سارح بيها
تحت الشباك من بره (يشير إلى شباك فى
أقصى اليسار) قوم ناديله وناوله الفكة يدك
المعلوم ..

يونس : أنا بس مش حاطول ..

مسعود : أناوله أنا .. معاك كام ؟

يونس : جنيه !

مسعود : جنيه بحاله .. يابن القرنلى ! جيبته مئتين ياله ؟

يونس : من عرق جيبى .. وعندى غيره ياما .. إيه وهو
أنا صغير والأ صغير ؟

مسعود : اوعى تكون لاطشه من حد ياله ؟

يونس : عيب ياعم مسعود .. ودى تيجى .. خد ..

مسعود : لا .. لما يعدى البياح اشتريك !

(فجأة تسمع ضجة وخبط وأصوات

لدى الباب فى اليمين)

الشرطى : اسمع الكلام ربنا يهديك ..

المحامى : (داخلا) عايز تقعدنى مع الأوباش .. مع

حُئالة المجتمع .. مع الحضيض ..

الشرطى : بلاش غلبة واسمع الكلام لا حَضْحَضْكَ والله

عتريس : (يغنى) لا ضَحْضَحْكَ واحْضَحْضَحْكَ

(يفتح عينيه) ماتيجى ياسيدنا الأفندى !

موش عاجبينك والا إيه ؟

المحامى : ياسيد يا أستاذ يا محترم أنا محامى .. ميتر
كبير .. أجمعها قضية أفركشها ..
الشرطى : يا أخى وماله .. أبقى فركشها على مهلك مع
الجماعة .. لكن أحنأ عندنا أشغال ..
المحامى : أنت فاهمنى غلط ! أنا أقصد إنه حصل فيه
سوء تفاهم وحضرتك مافهمتتش الظابط كويس
.. لأنه موش معقول أنا أستنى فى التخشبية !
عتريس : ألا يافندى الحضيض دى .. من يحطك فى
حضيض ؟
المحامى : شايف الجهل يافندم ! الحضيض بتاع مكسيم
جوركى ! يا جهلة ياميحة !
الشرطى : (يدفعه ويغلق الباب) فتك بعافية !
(يدخل متأففاً ويفحص المكان حوله
مصدرا بعض الأصوات التى تنم عن
القرف الشديد)
سعدية : ألا الأستاذ ماله ؟ حد دايقه ؟
مسعود : الأستاذ يا أولية يا جاهلة ميتر كبير .. بينقذ إالى
مال بيهم الزمن !
سعدية : ربنا مايحوجنا له ولا لتكشيرة وشه !
يونس : (صائحا) بتاع الحلاوة - أخ - غلطت -
المحامى : (كأنما لسعته عقرب) حد معاه حلاوة هنا ؟
هيه قولوا .. انطقوا طمنونى ..
سعدية : وهو ده وقته برضه ياسدنا الأفندى .. أبقى

تعال لنا البيت انت والحريم واحنا تحت
أمرك..

الحامى : بتقول إيه المدهولة دى ؟ هوأنا باتكلم لاوندى ؟
مسعود : لامؤاخذه يابيه أصل الواد عايز يشتري
سمسمية

يونس : عسلية !
مسعود : ولأ عسلية ! لما البياع يعدى تحت الشباك -
الحامى : (إلى مسعود بنبرة ذات مغزى) يعنى
موش .. حلاوة ؟

مسعود : لا يابيه لأ .. اطمن .. أتفضل .. أنت خفت
قوى كده ليه ؟ داحنا ولاد بلد ونعرف حرمة
الجار وحق الصداقة والإنسانية ! وحضرتك
دلوقتي عيش وملح ..

الحامى : إزاي ؟ هوأنا لسة كلت حاجة معاكم .. غير
بس نشفتوا ريقى !

مسعود : يبقى شوية ميه م القلة .. أهه !

الحامى : لامعلش .. متشكر ..

مسعود : أنا حلفت .. ولونقطة ..

الحامى : (شبه مرغم) وأدى نقطتين .. (يشعر
بخبطة على ظهره كأن السقف وقع عليه)
أى أى .. زهرى انقطع .. إيه اللى حصل !
أى أى (يقع على الأرض) لوح خشب وقع
على .. شوف لا يكون فيه مسامير .. السقف
وقع .. وسطى أنكسر ..

سعدية : يوه ياخويا قوم بلا قافية .. دا مسعود أفندى

ببرحب بيك ..

المحامى : إالى وقع على ظهري ده كان دراع مسعود ؟

مسعود : (غاضباً) مغلشش .. الله يسامحك ! بقى إالى

نرجبو بيه ونكرموه يعمل معانا كده ؟

يونيس : بتاع العسلية وصل ياعم مسعود ؟

مسعود : لأ لسة .. استنى شوية ..

عتريس : (يعتدل فى نومه) صلح له ظهره بمسمارين

يامسعود .. أصله لامؤاخذة واخد على ريش

النعام ..

المحامى : وانت ايه مضايك ياراجل أنت ؟

سعدية : مسكين ! مايجيلوش نوم بالليل .. رامى جتته

ع الدكة طول النهار

المحامى : (مدعوراً) هو بينام هنا ؟

سعدية : هنا ولا مش هنا ! يوه خضتني ..

المحامى : أنا إالى اتخضيت لأن ده مكان حجز مؤقت

ممنوع البيات فيه قانوناً وممنوع الاختلاط

أيضاً ..

سعدية : وإالى يقول لك إنه بقاله أيام محجوز فى

التخشبية ومختلط .. ولأ مختلط ؟

المحامى : تبقى مخالفة صريحة .. الظابط النبطشى ياخذ

جزا !

(صوت من الخارج : السمسمية ..

العسلية .. الحمصية .. السودانية)

يونيس : سامع ياعم مسعود .. نادى عليه الله يخليك ..
المحامى : استنى هنا انت حتعمل إيه ؟
مسعود : مافيش ياميتتر دا الواد جاع وعاييز حاجة
ياكلها ..
المحامى : أكل إيه دلوقتى ؟ مش تخليكو فى اللى انتو
فيه ؟
يونيس : (منادياً) يابتاع العسلية ! يابتاع
السسمية !
(الصوت من الخارج - حضر فلوسك
أنا جاهز)
مسعود : استنى شوية ياونس ..
يونيس : (ببكى) والنبي ياعم مسعود نفسى فى
العسلية ..
سعدية : الولد بيعيط ليه ياجدع انت وهوه ؟
مسعود : ياستى لحظة واحدة بس نطمئن إن الجو
خالى ..
عتريس : (يغنى) لما يبقى الجو خالى .. شوف لى
بوسة فى العلالى !
المحامى : ألفاظ منحطة !
عتريس : منحطة يابطة .. يادقن القطة
يونيس : (منادياً) يابتاع العسلية .. يابتاع
السسمية
(يطل البائع من الشباك ومعه لفة)
مسعود : يعطيه جنيها (أنا عاييز قيمة جنية ..

البائع : ميت قرش ؟ يانهار !
المحامي : (مفزوعا) سمعت ؟ ميت قرش ؟ ! ميت قرش
حلاوة .. مش كده ؟
يونس : (يتواثب حتى يخطف الورقة الملفوفة)
الله .. دا كتير قوى ياعم مسعود ..
البائع : ما اعرفش حاقدر أجيب ولا لا .. سلامو عليكم ..
(يختفي)
مسعود : الله .. والجنيه ! الجنيه بتاعك ياراجل انت !
انت ما خدتش الجنيه !
يونس : (فى سعادة) الله ! شوف ياعم مسعود ..
المرّة ده كتير قوى .. وفيها نوع تانى ..
مسعود : (ينظر فى الورقة ويسرع بانتزاع شئ
منها ويدسه فى جيبه) يبقى حاخذ منك
حتة أكلها .. وحاخلى الجنيه تشتري به حاجة
تانية ..
المحامي : اهو ده اللي أنا كنت عامل حسابه ! احنا
ياخوانا كلنا حنروح فى داهية اذا مسعود ما
رماش اللي خده م البياح .. لازم تتخلّص منه
فورا .. فاهم ؟ المسائل ده موش لعبة .. فاهمنى
يامسعود ؟
عتريس : (يغنى) يافاهمنى وفاهمك ياغزالى ..
ماتياالله على البرج العالى !
المحامي : اسمع .. أنا ماعرفتكوش بنفسى .. (يقدم

البطاقة وعدداً من الكروت) أنا اسمى
ممدوح سلامة .. إختصاصى قضايا
مخدرات.. وشايف إنك دلوقتى حتقع فى
مشكلة مالهاش حل ..

(يسرع مسعود بالهمس فى أذن عتريس
وينتبه رجال آخرون)

سعدية : العسكرى غاب وسابنا زى الولايا .. يعنى
ماكان زمانهم سالونى ومضونى وروحونى !

يونس : تاخذ حته ياعم ممدوح ؟

الحامى : لا لا لا .. دا زيادة عن اللزوم .. أنا حانادى ع
الظابط لازم أخرج فوراً من بؤرة الفساد دى !
تصور لو حد عرف إن أنا دخلت التخشبية ..
ولو بالغلط .. الحبس مش مشكلة .. اتحبسنا
قبل كده ٢٤ ساعة بتهمة إهانة المحكمة ! لكن
التخشبية .. مع الحثالة .. اللمامة .. سقط
المتاع .. والأخطر من كده إنهم جهلة .. يلعبوا
بالتار لعب ..

مسعود : (ينتبه فجأة - ويبدأ بالهمس) يانهار
موش فايت .. الأستاذ ممدوح سلامة ! ؟
ياخبر .. دنا غلطان من فوقى وتحتى .. وأدى
راسك أبوسها ،، وأدى إيدك ..

الحامى : إبعد يا جده أنت .. خلاص .. قبلنا إعتذارك ..
مسعود : عارفين مين يا إخوانى ده ؟ دا الحامى اللى
طلع إبراهيم سمونة براءة ..

عتريس : (ينهض لأول مرة) إبراهيم سمونة ..

يانهار زى اللمونة !

سعدية : هو العسكرى ده نسينا ولا إيه ؟

(يقوم من أقصى الغرفة رجلان كانا

يجلسان على الأرض ويقتربان فى رهبة

من المحامى)

بعللى : إبراهيم سمونة ؟

مسقاوى : إبراهيم سمونة

المحامى : اللى يسمعكم يقول إن أنا إبراهيم سمونة !

(يهزه طرب الإنتشار) والله لو كنت اعرف

إنه مهم كده كنت اتصرفت تصرف تانى ..

مسعود : أصل لا مؤاخذه إبراهيم سمونة رمز المجدعة

فى الكار كله .. كل إالى انت شايفهم دول

عيال .. (همهمة) لا مؤاخذه يارجاله

ماتزعلوش منى .. يعنى بعللى ومسقاوى دول

يعتبروا كده هلافايت .. فتافيت .. إذا قارنتهم

بإبراهيم سمونة ..

عتريس : دانا واللى خلقك .. أروح فيه فين ؟ (ينهض

ويجلس على الأريكة)

المحامى : ع العموم مين عارف ؟ موش يمكن تبقوا أشهر

منه ؟ ووايه يعنى - لا مؤاخذه - إبراهيم سمونة

؟ تاجر زى كل التجار .. قصدى يعنى

ماعدوش الحقه الملى تخليه يلمع ويضوى

ويلالى !

مسعود : لا مؤاخذه ياممدوح بك .. أنت غلطان أكبر غلط
فى الحقة دى .. إبراهيم الماظ من النوع الثقيل
قوى ..
المحامى : (يجلس) أنا رجلى تعبت .. ولاد الكلب دول
حيفتحوا الباب إمتى ؟
عتريس : راجل مآتاقلش بدهب !
مسعود : أقولك الماظ تقوللى دهب ؟
المحامى : انتو بتتكلما عن إبراهيم لسه ؟ شوفوا .. إن
شاء الله لولنا نصيب نتلاقى واحكى لكو
التفاصيل كلها فى أمان (يهمس) أنا بينى
وبينكو مش مستأمن الناس إللى هنا خالص ..
مسعود : ماحدش قال حاجة .. لكن قوللنا برضه ..
المحامى : (يزفر فى ضيق) مافيش حد بيحب شأى
ولا ينسون فى الحارة يايونس ؟
يونس : كتير ياأستاذ .. بس نادى عليهم بيجو قوام ..
المحامى : أنا خايف يطلعوا زى بتاع العسلىة إللى طلع
بتاع حلاوة ..
مسعود : لا مؤاخذه ياميتتر .. واحد زيك مافيش محكمة
مادخلهاش .. مافيش سجن مازاروش .. يقوم
لسه برضه يقول خايف خايف ..
سعيدة : يادى الليلة اللى موش فايته !
بعللى : إيه ياولية فيه إيه ؟
مستقاوى : ماتخرسى ألا والله أفتح دماغك !

سعدية : جرى إيه ياله انت وهو ؟ ماحدش قدكو والا إيه؟

مسعود : (صارخا) اسكت ياكلب انت وهو ..
عتريس : أصل وَحَشْتُهُم الضرب .. طب قسما بالله لو
ندهت العسكرية دلوقتي مايسييكو إلا هريسة
وش الصبح ..

بعللى : احتمى فى العسكرية ياخيخة ..
مسقاوى : صدق من قال عتريس خيشة الحكومة
(يضحك) هأع !

بعللى : (يضحك) هأع ! بيمسحوا بيها البلاط
المبرى !

عتريس : (ينهض فجأة ويستل مطوأة من نوع
قرن الغزال ويهجم على الإثنين)

رجالة اتفو .. ماحدش ينادى حد .. أنا بتاع
الحكومة .. طيب .. لا أنا حنادى ولا انتو تنادوا
.. واحد قصاد إثنين .. وشاهد علينا المحامى
.. شاهد ياممدوح بيه ؟

مسعود : ياخوانا مش كده .. حنغور بعض ..
وحيفصلونا .. (يهمس إلى عتريس)
وتتضارب أقوالنا ..

عتريس : أنا أقوالى ثابتة ..
مسعود : أقوال الحريم والعيال .. خليك معاى ..
عتريس : انت سمعت إلى قاله الكلبين دول ؟

مسعود : امسحها فى المرة دى .. احنا لسه ع البر ..

معلش ..

عتريس : مافيش معلش .. لهم يوم معاى ..

مسعود : واهو البيه شاف كل حاجة وسمع كل حاجة ..

(يذهب إليه فيجده فى حالة هلع - يبلع

ريقه ويرتعد) الله الله الله الله الله ! كده

نشفتوا دم الأفندى ؟ شوية ميه يايونس م

القلة ..

المحامى : (يحاول الكلام بصعوبة) أنا لا لا لا ..

متشكر خالص ..

مسعود : والنبي أبدا .. القلة ياد

(يسقيه ماء من القلة)

المحامى : أشكرك .. أصلى خفت السلاح يطول ويحصل

مالا تحمد عقباة ..

سعدية : مسكين معانا يالفندى .. شايفين الكلام

الطو .. مالا تحمد عقباة والحاجات دى ..

مسعود : والنبي أنت رخره ، احنا فى إيه والا فى إيه ؟

سعدية : أصلكو مقاطيع .. مالكو فى العلام ولا الكلام

الطو ..

عتريس : المدام تحب اللغة العربية .. ياعينى ع النحوى

ياعينى ..

مسعود : ياخوانا احنا .. (يضرب كفا بكف) نستااهل

اللى يجرا لنا .. احنا كده .. (فائرا) ربنا

خلقنا كده .. لازم ندبح بعض عشان نستريح ..

المحامي : لا مؤاخذه يا أستاذ مسعود .. انتو .. انتو ..
مسعود : احنا باختصار ولاد كلب .. مايطمرش فينا
خير ..
المحامي : ليه جاي على نفسك كده .. مش تفهمني ؟
مسعود : هي دي عايزة تفهيم ؟ ماهي واضحة زي
الشمس !
المحامي : أقصد يعني إن كنتو كلكو مع بعض .. يبقى
لازم تقفوا أيد واحدة ..
مسعود : يا حلاوة على كلام المحامين ! اسمعوا وعوا
يا غنم يا بجم ..
بعلبي : ما احنا مع بعض أهه !
مسقاوي : موش جابونا سوا ؟
سعدية : البيه قصده نخط إيدينا في أيدين بعض ..
بعلبي : طب هاتي أيديك بقي .. خشي على
مسقاوي : عيب يا بعلبي ..
يونس : أنا جعان يا عم مسعود .. فيه حلاوة فاضلة ؟
مسعود : ناقصك أنا كمان ؟ لا مافيش .. انجر اقعد ..
كانت شورة مهبية .. ياريتنا لارحنا ولا جينا ..
وإيه اللي جاب الواد ده معنا ؟ هو كان بيوزع ؟
عتريس : اقل بقك يا مسعود .. الحيطان لها ودان !
المحامي : عتريس عنده حق يا مسعود .. لو قدرت ما
تكلمش خالص أحسن ..
سعدية : وده يقدر ؟ ده بالغ راديو !

المحامي : حلوة دى !
يونس : (ييكى) أنا عايز حلاوة ياعم مسعود .. أنا
جعان ياعم مسعود ..
سعدية : خد يا يونس خد .. حته شكيطه أهه .. بس
خايفة تكون ساحت
يونس : ما احبش الشكيطه .. أنا عايز حلاوة ..
المحامي : إذا كان حد معاه أكل يشوف يونس
المسكين ده ..
مسعود : بصراحة بقى .. أنا رأى إن ممدوح بيه مجدع
ويستاهل كل خير ..
المحامي : أنا تخصصى في القضايا موش في الناس ..
وأرجو ماتفهمونيش غلط . قضايا المخدرات
دى شغلتي .. يعنى بأكل منها عيش .. يعنى
مش باعملها جدعة ولا شهامة للجدةان ..
عتريس : بالفلوس يعنى !
سعدية : كل حاجة فى الزمن ده بقت بالفلوس ..
المحامي : غلط .. بالفلوس الكثير .. بالأتعاب
الثقيلة قوى ..
مسعود : ما تخلينيش أغير رأى فيك ياميتز أمال ! يعنى
لو شفت واحد برئ وانت مقتنع إنه برئ ..
والأدلة تدل على إنه برئ ..
المحامي : ومفلس ؟
مسعود : يعنى حاله مايل ..

المحامي : يبقى يتكل على الله ..
عتريس : أدى الشهامة والجدعة !
بعللى : المحامى طلع فشك ..
مسقاوى : زى القطط .. يصاحبوك عشان يتعشوا ..
سعدية : إذا كان كل حاجة بقت بالفلوس .. اشمعنى
يعنى القضايا تبقى ببلاش ؟
مسعود : طب ولو جالك واحد مريش وانت مقتنع بإنه
مذنب ..
المحامي : يا حبيبي أنا خدام القرش ..
بعللى : اخص ..
مسقاوى : ياللعار !
عتريس : عشان كده أنا ما حبش المحامين .. باقفل بقى
وربنا بيستر ..
مسعود : يا خسارة .. داكان عندى أمل بعد العيش
والملاح نوكل الميتر عننا ..
عتريس : أمل إبليس فى الجنة .. والا هى عشم ؟
المحامي : إن شاء الله بعدين لما يعملوا الإجراءات ..
لواتهموا حد .. ادبتوا عارفين المكتب .. وإللى
معاه كعوب يلعب ..
بعللى : البيه من رشيد ؟
المحامي : (يضحك فى دهشة) اشمعنى ؟
بعللى : أصل كلام سيادتك كده فيه حاجات رشيدى ..
المحامي : زى الكعوب قصدك ؟

(يُسمع المنادى : عسلية - سمسمية -
حمصية ..)
(إلى مسعود) مسعود .. مسعود !
مسعود : (وقد خاب أمله فى المحامى) أيوه
ياميتر .. تحت أمرك ..
المحامى : اسمع .. بياع الحلويات وصل .. تلاقيه جاب
التمانناشر قرش الناقصين ..
مسعود : تمانناشر إيه ؟ انت بتقول -
المحامى : اسمع وانت ساكت .. لما قلت جنيه هو قال
إيه ؟
يونس : ميت قرش ..
المحامى : وقال إيه كمان ؟
يونس : ما اعرفش حاقدر أجيب والا لا ..
المحامى : برافو عليك يا يونس .. ولد بمليون جنيه ..
مسعود : يعنى فكرك ؟
المحامى : انت حتعملهم على ؟ أنا قلت لك إيه اول
ماسمعت حكاية الحلاوة ؟
مسعود : قلت لى أرمى اللى فى جيبك ..
المحامى : قام انت عملت إيه ؟
مسعود : (فى حالة هلع) أنا ماعملتش حاجة
المحامى : لا عملت .. انتهزت فرصة خناقة بعلى
ومسقاوى مع عتريس .. ورحت دافس القرشين
فى جيب عتريس !

عتريس : يا بن الكلب ! قرشين مرة واحدة ؟ وانا إالى
بقول لك نقفل بقنا ومانتكلمش والحيطان لها
ودان ..

مسعود : ماحصلش .. ده كذاب
الحمامى : والله دى مسألة خاصة بيكو .. أنا إيه إالى
جائ لى منكم ..

سعيدة : اسمع كلام الميتر يامسعود ..
الحمامى : الميتر موش عايز حاجة .. الميتر بيقول لكم
ارموا للراجل الورقة ام جنيه وقولوا له مع
السلامة ..

عتريس : (يخرج اللقافة من جيبه) والبلوة فى جيبى
دى ؟

الحمامى : لو قدرت تلفها فى الجنيه يبقى أحسن ..
عتريس : ماشى كلامك ياميتر .. (يفعل ذلك) مع
السلامة بابا .. موش عايزين النهاردة ..

(المنادى فى الخارج - فيه صنف أحسن
بكره ؟ عايزين بكام قرش ؟)

مسعود : أنا بس بدى أشرح لعتريس ..

عتريس : لا تشرح لى ولا أشرح لك .. قضيتك حاجة
وقضيتى حاجة تانية .. وأنا مهما قلتوا مش
ممکن أصدق إن الحمامى إالى طلع إبراهيم
سموثة مالوش فى الدنيا غير الفلوس .. لا
يارجاله .. ربنا عرفوه بالعقل .. الراجل معروف

واسمه زى الطبل .. يعنى حيكون محتاج
للقرشين العُمى إالى حيدوهم له تجار قطاعى
سَكُّ زى حالاتنا ؟

المحامى : أرجوك ياعتريس .. ريعَ جسمك ع البنش ..
ماتتعبش نفسك .. أنا باشكر الصدف السعيدة
إالى بتجمعنى ساعات مع الزباين خارج المكتب
(يضحك) حلوة دى ؟ ولو أنكو لسه
مابقيتوش زباين ..

مسعود : والله عتريس قرر يبقى زبون .. وقرر يرمى
جنته على سعادتك ..

المحامى : السوق مافيهوش رمى جنت .. السوق فيه أخذ
وعطا .. يعنى مثلاً قضية النائب ..

سعدية : الله ! النائب داخل فيها أنت كمان دى ؟
المحامى : داخل إيه ياهانم ؟ دى أخبارها بيتنشر فى
الجرايد كل يوم ..

سعدية : مش محامى حد فيها يعنى ؟

المحامى : ياهانم دى قضية تافهة ماتستاهلش .. لكن
بقى عشان شبكتُ فيها شخصية كبيرة ..
كبروا القضية وكل يوم والتانى يسكوا شهود
ويحولوهم متهمين ! وده ظلم مافيش بعده ظلم
سعدية : (تزغرد) افرحى يامه .. ارقصى يامه ..
بنتك طلعت براءة ..

المحامى : المشكلة عندنا فى مصر زى مانتو عارفين هى

مشكلة إجراءات .. ليه ؟ لحماية الأبرياء اللي
غيرهم ممكن يقعهم فى فخ .. عشان كده
دايما أنصح زبائنى أقول لهم أوعى يابنى تحط
حاجة فى جيبك ما انتش عارف إيه هي ..
عتريس : واحنا دايما نقول .. لو فيه كبسة .. أيا كانت ..
ارموا اللي فى جيوبكم أو فى أيديكم ..
المحامى : الحاجات دى أساسية .. لأن العبرة بالحياة ..
سعدية : يعنى أنا ماليش خلاص فى النابت ؟
المحامى : دا يتوقف على إذا كان حد ابن حرام حط لك
حتة هنا والا هنا عشان يورطك .. وبدال ما
تبقى شاهدة تبقى متهمة ..
سعدية : ابن حرام زى مين ؟
المحامى : زى أى حد ! أنا والله ياخوانا باشرح لكو
حاجات بدائية .. موش مهم يكون مين .. لكن
انتهرى أى فرصة تروحي فيها وارمى كل
الحتت اللي تلاقيها .. هي دى أكبر أدلة ..
سعدية : أه لو أعرف ولاد الحرام مين دول ؟
(عسكرى يدخل ويقرا من ورقة : سعدية
حسنين)
تقعدوا بالعافية ! وشك حلو علينا ياسيدنا
الأفندى !
المحامى : (منتفضا) الضابط قال إيه ؟ هيه .. رد قول ..
أتكلم .. أنت عارف أنا بقى لى هنا قد إيه ؟
أنت عارف أنا وقتى ثمنه كام ..

العسكري : أنت حتتلمى تسكت والّا أطلعك الخن فوق ؟
المحامى : خن أية ؟ من غير قانون ؟ فاكرنى خايف ؟
مسعود : خلاص يا شاويش حقتك علينا ..
عتريس : ما يقصدش يا شاويش
المحامى : إيه يعنى ؟ بيطلع ويدخل على مزاجه ؟
العسكري : يالله بينا ياست أنتى كمان ..

(ياخذها ويخرجان)

المحامى : إيه ؟ مش حاروح النهاردة ؟ أنتو عارفين
الساعة كام ؟
مسعود : وأنت عارف الخن ده شكله إيه ؟
عتريس : أصبر، فات الكثير ما بقى إلا القليل ..
المحامى : لا مؤاخذه ! بس أنا ما عدتش طايق ..
(يضرب الباب بعنف) أنتو ياللى هناك ..
ياشاويش .. يا ضابط ! يا جماعة ياهل البيت !
يا شاويش !

(يمسكه مسعود وعتريس بالقوة)

(يجلسانه ويحاولان تهدئته)

مسعود : أنت موش عارف انت بتعمل إيه ؟
عتريس : واللو لوطلعوك من هنا من غير إحالة أو إفراج
مانت شايف النور بعينيك ..
المحامى : (يهدأ) ليه بس ياخوانا ؟ هو مافيش قانون
فى البلد ؟ هو مافيش عدالة ؟
مسعود : فيه .. فيه كثير قوى ..

عتريس : العشرة بقرش !
بُعْلَى : بقول ياميتز ..
الحامى : قول يا بُعْلَى ..
بُعْلَى : أنا عتريس هو اللى بيشتغلنى ..
عتريس : اخرس .. كلب ما تختشيش ..
بُعْلَى : يعنى يبقى على اتهام أنا كمان ؟
عتريس : اتهام إيه ياد ؟ هو فيه قضية أصلا ؟
مِسْقَاوَى : قصده قضية الغش ..
عتريس : أحنا مالنا ومالها دى ؟
بُعْلَى : موش أحنا إالى كنا بنوزع لك ؟
عتريس : ياكلاب يا ولاد الكلاب اقفلوا بكم ..
مِسْقَاوَى : مافيش حد غريب يا عتريس .. الله ..
عتريس : أنا حالف لكم ولى ويأكم يوم ..
مسعود : يا عتريس طلع الغل من صدرك .. خليك عاقل
ومنطقى .. الميتر بيقول ما دام مالقوش معاك
حاجة يبقى براءة ..
عتريس : وعشان كده حطيت لى القرشين فى جيبى ؟
مسعود : انا ما حطيتش حاجة .. ما تصدقش .. ودى
معقولة دى ؟ أخون شريكى وحبيبى ؟
عتريس : دانت تخون نفسك يا جبان ..
بُعْلَى : يعنى أحنا براءة ؟
مِسْقَاوَى : حيخلونا نروح ؟
مسعود : المهم الحيازة ..

بَعْلَى : حيازة آه ؟ يعنى إيه حيازة ؟
الحمامى : الحقيقة دى مشكلة أنا ماليش خبرة بيها ..
عتريس : آمال مين إالى له ياميتز .. خليك معانا بقى ..
كمل جميلك ..
الحمامى : أصل الحكومة قلقت قوى لما لقت ناس بيغشوا
الصنف
عتريس : طول عمر الناس بتغش الصنف ..
الحمامى : لأ دا غش بيعمل تسمم والعياذ بالله .. وموت
مسعود : ياساتر ازاي؟
الحمامى : عند الغشيم .. إالى بيشرى لأول مرة .. إالى
بياخده بالغلط .. الأطفال !
(يونس يصرخ ويقع مغشيا عليه)
يانهار أسود .. معاك الورقة إالى كانت فيها
الحلاوة يامسعود ؟ حنروح كلنا فى داهية ..
وأنا قبلكم فى الجريمة !
مسعود : ورقة إيه ياميتز .. آه .. الورقة إالى كان ..
الحمامى : (يرش ماء على وجهه يونس) يونس
ياحبيبى مالك .. جرى لك إيه ؟
فتح يابنى قول حاجة .. (يضع أذنه على
وجهه) لسه بيتنفس الحمد لله .. عايزين
بقى دكتور فوراً أحسن يضيع منا ..
عتريس : نطلب دكتور القسم .. سهلة دى .. اطلب دكتور
راجى

المحامي : راجى حمار .. وحيبقى فيها سين وجيم ..
خليتا نرتب الإجابة قبل مانضيع كلنا فى حبل
المشقة ..

مسعود : عايزنا نقول إيه !
المحامي : أنا مش عايز حاجة ! أنا عايزكو انتو
تساعدوني عشان نمسك إالى حيموت الولد
ده .. قول لى ياعتريس .. البياع بتاع الحلاوة
تبعك ؟

عتريس : ولاتبعى ولا اعرفه .. وراس النبى واهل بيت
النبى ..

مسعود : قول ياعتريس أحسن يضغ له الليلة عشرين
نفر بالحلاوة ..

بغللى : ده تبع محمد غزال ياميتز ..
المحامي : مين محمد غزال ؟
عتريس : الكلب ! شريك مسعود !
مسعود : شريكك انت قبل ما يكون شريكى .. وانتو اللى
عملتو الصنف المغشوش ..

عتريس : هو احنا لحقنا ؟ انتو إالى عملتوا معظمه ..
المحامي : المهم دلوقتي تتخلصوا منه كله أحسن يودى
الناس فى داهية ..

مسعود : عتريس هو اللى
عتريس : مسعود هو اللى ..
المحامي : انتو الاتنين .. عارفين غزال ومخابئه ..

بَعْلَى : وأنا كمان .. أنا كنت باوزع له
المحامي : برفو عليك .. وانت يامسقاوى كمان ؟
مسقاوى : وأنا ياميتر .. ربنا يخليك لينا ..
المحامي : مات .. مات .. يونس مات ..
(يهرع إلى يونس ويصرخ : مات ..
يونس مات)
الجميع : لا حول الله .. والله لا ندبحك ياغزال ..
ياغزال الكلب ..
(عندها يفتح الباب ويدخل الشاويش
ومعه ضابط برتبة كبيرة وضابطان
شابان)
الشاويش : (داخلا) ماشى ياريس .. قول له يقوم
أحسن يستحلاها !
يونس : (يفتح عين ويغمض اخرى) خلاص ؟
المحامي : ابوه خلاص يا حبيبى قوم .. (يقبله) انت
كنت خايف ؟
يونس : (فى خجل) لا .. شوية كده ..
الضابط : أنا اشكر لك همتك باممدوح بيك .. المسألة
كانت زادت عن حدها خالص ..
المحامي : المهم تلحقوا تمسكوهم وتحرزوا الصنف
المغشوش عشان يتحلل فى المعمل فوراً
الضابط : من غير كلام ! واحب أطمئنك إن احنا سجلنا
كل كلمة اتقالت من ساعة مداخلت .. وأؤكد لك

إنك تنفع تشتغل ممثل من الدرجة الأولى
المحامي : خلى دى لإبنى بقى .. مش كده يايونس ؟
يونس : عارف يابابا أصعب حته إيه ؟ تمثيل العياط !
الشاويش : (مقتاداً الأربعة إلى الخارج) وعلى فكرة
ياباشا إحنا تابعنا سعدية ولينا من بيتها كل
العبوات من كل مكان .. طلعت فى عشر دقائق
لوحدنا إالى كان ممكن نطلعاه فى عشر
ساعات!

الضابط : وأدى بلوة ثانية بعيد عنك ..
المحامي : هى حكايتها إيه بالضبط ؟
الضابط : لا لا لا .. دى عايزه لها مسرحية لوحدنا
(إظلام)
النهاية

انت فين يا ابا ؟
مسرحية من فصل واحد

(غرفة مكتبه أنيقة في منزل أهد رجال الأعمال - مؤنثة تأنيثاً فاخراً وبها لوحات ورسوم بيانية وإحصائية وتدل على الجهد الكبير الذي بذله صاحبها في العمل والعلم جميعاً . عندما ترفع الستائر يرن هباز الاتصالات الداخلية (الإنتركوم) فينبض عباس وهم يغفغف عليه يتفضل .. أهلاً وسهلاً .. وعلى وجهه يبدو الترحيم والتعظيم وهو يحاول أن يتمالك نفسه في مواجهة الزائر .)

(يدخل حمدي وهو شاب من شباب التسعينات - يرتدي الجينز وقميصاً ملوناً ويسير سير الرياضى الذى يتوسل بالرياضة للانتصار على منافسيه من الأولاد في معارك الشوارع - وله سوارف طويلة ومركبات وجهه مستقاة من نجوم السينما - يمسك سلسلة فيها مفاتيح تومى بأن لديه سيارة - يتكلم بلهجة تمثيلية)

عباس : (مرحباً بالزائر) أهلاً أهلاً .. اتفضل حمدي بك ..
حمدي : لا لا لا أرجوك .. بلاش الباهوية والباشوية ..
عباس : أقصد يا أستاذ حمدي ..
حمدي : من باب إذا كبر ابنك خاويه ؟ (يضحك) ماشى

عباس : خير يا حمدى يابنى .. انت أزعجتنى جدا فى
التليفون .. خبر إيه ده اللي حيهز الدنيا قول
لى ..

حمدى : مافيش حاجة ساقعة .. فنجان قهوة ؟ مش
ده منزل عباس المناديل برضه ؟

عباس : معلش .. حقه على يا حمدى .. (يضغط

على الإنتركوم) أيوه .. انتو حتجيبوا حاجة

للضيف والا لا ؟ (سعيدا) كده ؟ عال عال !

(إلى حمدى) حيجيبوا أناناس طازة .. يعنى

مش ثم العلب .. (مستدركا) على الله تكون

بتحب الأناناس ؟

حمدى : مافيش مانع يا عباس بك .. مافيش مانع أبداً

عباس : (يتنحنح) وايه اللي .. قصدى .. مش نخش

بقى فى الموضوع ؟

حمدى : الموضوع لطيف وظريف ومسلى لآخر درجة !

عباس : مسلى ازاي ؟

(يدخل خادم ومعه صينية عليها إبريق

ملء بالاناناس وفيه ثلج وكوبتان)

حمدى : آه .. الأناناس

عباس : أيوه اتفضل .. (إلى الخادم) مع السلامة

انت .. (إلى حمدى) كنت بتقول مسلى ..

حمدى : أنا أصلى موش م القاهرة .. من وجه بحرى ..

عباس : الله ! زىي .. مانا كمان ..

حمدى : من دمنهور .. طبعاً .. مانا جاى لك فى الكلام

لوتصبر على ..

عباس : (يقدم إليه مزيداً من الاناناس) اتفضل ..

اتفضل .. دا مريح للجهاز العصبى ..

حمدى : وأول ماوصلت كان هدفى أدور على اللي

يساعدنى أنفذ وصية المرحومة أمى ..

عباس : الله يرحمها .. خير ..

حمدى : أنى ألاقى والدى واتصالح معاه ..

عباس : ولقيته والحمد لله ؟

حمدى : والدتى عاشت طول عمرها منفصلة عن والدى

.. الله يرحمها .. كانت ظروفها صعبة وكانت

من النوع الكتوم .. تصور حضرتك مارضيتش

تقول لى أى حاجة عن والدى إلا فى آخر

أيامها .. بعد ماربيتنى وعلمتنى وأطمنت على

.. يعنى بعد ماخست انها موش محتاجة لأبويها

.. ولا لجوزها إذا كان لسه متجوزها ..

عباس : ليه هو ماطلقهاش ؟

حمدى : ما هو ده السر اللي مارضيتش تقول لى عليه

أبدا .. كانت صموته .. اعتبرت إن ربنا سبحانه

وتعالى عطاها اختبار .. امتحان شاق ..

عسير .. قصدى أنها تخبى أخبار الوالد عن

ولده .. ومع ذلك تضمن ان الولد يكبر في

صحة نفسية سليمة .. يعنى طبعاً, مادام موش

محتاج لرعاية مادية ولا لرعاية نفسية من النوع
اللى بيوفره الأب ..

عباس : انت كلامك زى المثقفين والفاظك بسم الله
ماشاء الله من نوع راقى جداً ..

حمدي : يا عباس بك دلوقتي تعرف السبب .. أنا والدتي
كانت تكره الجهل وتحقر الجهلاء .. وكانت
دايماً تقول لى : إذا كان والدك ساب لك شىء
فهو الكنز الأدبى اللى فى أودة الصالون ده ..

عباس : تقصد مكتبة والدك

حمدي : والدى كان غاوى أدب جداً .. ورغم أنه كان
تاجر إلا أنه ورث من جدى حبه للغة والتبحر
فيها .. وده يمكن اللى لخط حياتى ..

عباس : انت لسه بتقول انه كان ناجح !

حمدي : اقصد حياته الشخصية .. فجأة زعل من
والدتي وسابها .. وسافر من غير مايقول على
فين .. ترك كل شىء .. حتى ابنه اللى كان لسه
جنين فى بطن امه ..

عباس : يعنى عمره ماشافك .. ولاشفته ؟

حمدي : يافندم أنا بيتها لى انه ماكانش عارف ان ماما
حامل فى ..

عباس : معقول مراته ماتقوللوش ؟

حمدي : وهو معقول يسيبها فجأة إذا كان عارف وهو
عنده كل المشاعر الأدبية الفياضة اللى بتتطلق

بالحب والخير .. واللى بتشع من مذكراته
الجميلة ..

عباس : (مقاطعا) مذكراته ؟ مذكرات إيه ؟

حمدي : والدى كان بيكتب مذكراته يوم بيوم .. يمكن
كان عايز ينشرها .. لكن حط فيها كل أخباره
وأسراره وأسماء معارفه .. وخلصه تجاريه ..

عباس : ووالدتك عطتك المذكرات دي ؟

حمدي : (يتنفس الصعداء) بعد ما اتخرجت

واشتغلت .. مش قبل كده .. كنت زى الغريق

اللى لقي قشة يتمسك بيها .. قرئت كل كلمه

فيها وبعد تعب ودراسة متأنية قدرت أفهم

شخصية والدى .. ويعدين عرفت انه له معارف

كثير فى القاهرة ممكن يدلونى عليه .. وانه

حاليا فى القاهرة .. وانه اتجوز واحدة ثانية ..

لكن ما خلفش منها .. وانه كمان غير اسمه

القديم وعمل لنفسه اسم شهرة جديد يناسب

الشركة الجديدة اللى أنشأها ..

عباس : لكن علاقته بوالدتك انقطعت تماما ؟

حمدي : الله أعلم إيه اللى حصل .. مافيش فى

المذكرات كلمة واحدة عنها بعد ماسابها ..

وهي ماسمعتش عنه أى شىء .. ولا حتى

وصلها منه فلوس .. يعنى كأنه مش موجود فى

الدنيا ..

عباس : ده مش تصرف ناس بتوع أدب !
حمدي : ما حدش عارف ظروفه إيه يا عباس بيه !
خصوصاً بعد ما شركة الورق الخاصة
نجحت .. وانتفعت منها كام شركة .. بسم الله
ما شاء الله ..
عباس : دى قصة غريبة يا حمدي يا بنى .. قول لى ..
أنت جيت لى أنا ليه .. وعازنى أساعدك إزاي؟
حمدي : مش معقول ما قدرتش تخمن يا عباس بيه !
لاحظتش الشبه الغريب بين قصتى .. وقصتك !
عباس : أيوه صحيح .. تشابه غريب .. احنا الاثنين من
دمنهوور ... وانت فى سن يسمح لك تكون
ابنى .. وأنا فى موقع يسمح لى أكون أبوك ..
حمدي : عباس بك .. صدقنى .. انا هلكت نفسى عشان
أناكد .. وماجيتش الا أما أناكدت .. حضرتك
نجا فرج غريب الشهير بعباس المنادىلى
صاحب شركة الورق المتحدة .. وزوج عطية
هانم غزال .. اللى ترك دمنهوور فى أغسطس
١٩٦٢ بعد تأمين مضررب الرز بتاع العيلة ..
ويمكن ماكانش يعرف ان مراته حامل ! وعمل
مجهود جبار عشان يغير شكله واسمه ويبدأ
من جديد فى القطاع العام - ومن داخل القطاع
العام - لحد ماوقف تانى على رجليه !
عباس : (يبتسم فى ثقة) دى معلومات صحيحة مية

فى المية .. بس موش أسرار ولاصعب
الحصول عليها .. يعنى كل وثائقها متسجلة
فى الجهات الرسمية .. وكل تفاصيلها معروفة
- زى مايقولوا - لدى السلطات !

حمدى : وكل الناس ياترى عارفة انى ابن حضرتك ؟
عباس : (يبتسم) قصدك إن ده هو الخبر اللى حيهنز
الدنيا ؟

حمدى : أنا كنت متصور ان عاطفة الأبوة أقوى من
كده!

عباس : أقوى من عاطفة البنوة ؟
حمدى : عباس بك أنا درست علم نفس .. الأم غير الأب
.. وعاطفة الأبوة مايتموتش أبداً .. لكن
البنوة -

عباس : الولد بيكبر ويبيستقل .. مفهوم ..
حمدى : يعنى حتسمح لى أعلن الخبر .. غير المهم ده ؟
عباس : (يضحك) ودا السبب اللى جيت تشوفنى
عشانه النهارده ؟ أعلن ياسيدى .. أعلن بدال
المره ألف .. والا تحب أعلن لك أنا ؟

حمدى : (ينهض فى ضيق عارم) عباس بيه حضرتك
والدى صحيح .. دانا كنت متصور أنك متلف
تشوف ابنك الوحيد .. اللى سبته جنين فى
رحم امرأة حرمتها كل شىء .. لكن بيدو أن
الأدياء بتوع خيال بس .. الواقع بالنسبة لهم
مالوش وجود !

عباس : كنت متصور إيه يا حمدى يا بنى ؟ انى أخذك
بالحضن ؟ أسكنك عندى فى البيت ؟ أشغلك
عندى فى الشركة ؟ أورتك أموالى وأملاكى ؟
حمدى : انت زعلت يا عباس بك .. حقتك على .. انت
ابويا برضه ولازم أحترم واجب الأبوة .. أنا
الظاهر حاولت أخلى القصة مشوقة .. عكت
على دماغى !
عباس : لا ماعكتش ولا حاجة .. انت لسه معاك
أسلحتك وحتلعب .. شوط !
حمدى : موش فاهم قصدك إيه ؟
عباس : لا .. فاهم كويس أوى .. انت موش جاي عشان
تقول لى أفرح ! أديك لقيت ابنك بعد سنين
وسنين ! لا .. انت عندك كلام تانى .. ياله قول
اللى عايز تقوله ..
حمدى : أنا فخور بانى ابن حضرتك .. وأؤكد لسيادتك
إنى عملت كل اللى فى طاقتى عشان أرسم
الدور اللى لعبته دلوقتى رسم محكم .. ربنا
عالم .. لكن معلش .. مافيش فايده ..
عباس : (محتدا) حتكون صريح معاى يعنى ؟ حتكم
والا حتضيع وقتى ؟
حمدى : فى الشنطة دى (يشير الى سمسوننايت
نحيفة) وثائق الصفقات اللى عملتها انت
والشماع بيه فى لندن فى الفترة من ٢٥

سبتمبر الى ٢٣ أكتوبر ١٩٧٠ - وكل
التفاصيل الخاصة بالعمولات التي خدتها
بالمارك الألماني وتحولت على فرانكفورت سنة
١٩٧٢ ، وتفصيل خروج الشماع بيه على
المعاش فى ظروف مريبة ورجوعه اسكندرية
واختفاؤه بعد اكتشاف قضية العملة الاجنبية
المشهورة .. (يصمت لإحداث التاثير)

عباس : أنا معاك - (يقدم اليه سيجاراً) سيجار ؟
حمدي : شكرا عباس بيه .. مابدخنش .. (صمت)
عباس : ده سيجار .. أجنبى .. (يضحك فى مرارة)
جرب ..

حمدي : لا أجنبى ولا مصرى .. حضرتك عارف بقية
القصة !

عباس : أنا عارف م اللي نشرته الصحف .. المحاكمة
الغيايبية .. اللي مالهاش قيمة ..

حمدي : كويس .. نجرى فى الزمن شوية .. (يمثل
كأنه على المسرح) على آخر السبعينات ..
زى ماحضرتك فاكر .. كان الشماع بيه ظهر
من جديد ومعاها جنسية أجنبية ..

عباس : عربيه والا ..
حمدي : (يضحك) عربية مية فى المية .. ونسيبها
مفتوحة ..

عباس : أنا فاكر انه كان بيشتكى انهم كتبوا اسمه
غلط...

حمدي : كتبوه الشمام .. مطبوط ! لكن الحق يقال ..
الراجل كان تقى وبتاع ربنا .. عمره ماشرب
ولاشم ولاخد نفس م اللي بالى بالك .. الله
يرحمه .. أيامها كانت الدنيا مقلوبة عشان
الأحداث السياسية اللي أثرت على الاقتصاد ..
والمنابر والأحزاب .. ومابين يوم وليلة كانت
الشركات الجديدة واقفة على رجلها .. والفقير
بقى مليونير .. والفلوس بتجرى زى فيضان
النيل بتاع زمان ..

عباس : لكن أنت .. أنت .. أنت كنت فين ؟

حمدي : عندك حق .. أنا كنت صغير .. يوم موت
الشماع بيه كنت بتدرب فى مكتب محامى فى
دمهور .. لقيت واحد صاحبي داخل على
بحماس ويقول لى انكتب لك السعد .. قوم بينا
على اسكندرية .. ايه ياعم فيه ايه ؟ قال لى
مالكش دعوة .. المحامى الكبير اللي اترافع عن
الشماع بيه بيدور على شبان مفتحين .. خدت
له عبد الفتاح شتا .. وحسن الجباس
وابوالعينين على .. وانت اللي فاضل ..
ومافيش يومين وكنت مترستق فى مكتب صالح
باشا ..

عباس : لكن أنت مالكش مكتب مستقل .. ما انتش
محامى يعنى ؟

حمدي : أنا اشتغلت محامي بما يرضى الله .. لحد ما والدتي اتوفت .. وسابت لى المذكرات دى .. اعتمدت فى ادارة المكتب على الولاد .. وتفرغت للبحث عن والدى ..

عباس : انت لسه مصر على حكاية المذكرات ؟ ماتخلينا فى المهم !

حمدي : هو فيه أهم من الاسرة .. من رابطة الدم ؟

عباس : وبعدين ؟ آخره الحكاية إيه ؟ نهايتها إيه ؟

حمدي : مالهاش نهاية ! .. الحكم اللى صدر على نجا

فرج غريب - زى ما حضرتك قلت - كان غيايى

ولا يعتد بيه .. ولا بد من إعادة المحاكمة إذا

تأكد للسلطات ان المناويل بك هو نجا فرج

غريب ..

عباس : (منهارا) يبقى هو ده الخبر اللى حيهز الدنيا

.. عندك حق .. كنت م الأول قول لى انك

محامى من هواة الابتزاز .. ومن هواة أفلام

الصوص وقطاع الطرق .. آل ابني آل ! أنا

أخلف ولد حرامى ؟ أنا اللى عشت أكافح

وأتعب لحاد الدكاترة مايسوا منى ! أنا رمز

الشرف والأمانة ..

حمدي : يا بابا أنا رقبتي فداك .. وإذا وصلت الحكاية

لإعادة محاكمة نعيدها ونكسب القضية .. انت

بتكلم ابنك .. من دمك ولحمك ..و اللى يكسب

أى قضية فى الدنيا ..

عباس : قضية إيه يا ولد .. أنت اتجننت .. أنا ..

بمركزي وسمعتي دلوقتي أتخط في القفص ؟

حمدي : القانون ما يخوفش بابا .. لازم الحق يظهر
وبيان ..

عباس : قانون في عينك .. كلب ماتختشيش .. أنت

ناسي ان كلمة واحدة النهاردة في جرنان

معارضة تهدد اللي بنيتة .. في سنين طويلة

مالهاش نهاية .. تهدني وتهدي سمعة الأسرة ..

وتهدك لو كنت ابني بصحيح .. كلمة واحدة

ولو غلط .. الكلام في بلدنا بيهد .. مابيينيش !

حمدي : لكن الحق ببيان في النهاية بابا .. اسمعني
بس ..

عباس : أسمع إيه ؟ دا تصرف ولد بيقول انه بيحب

أبوه .. دا يبقى ولد أرعن .. ولد قالت ..

حمدي : ماتزعلش نفسك بابا .. مش عايز نرجع

للقانون عشان نرد اعتبار بابا .. بلاش .. تكفي

ع الخبر ماجور .. (بحركات تمثيلية) نحول

مسيرة القطر على قضبان ثانية خالص ..

عباس : موش فاهم ! قصدك إيه ؟

حمدي : ركز معاي شوية واحنا ننتهى .. أنا اتولدت

مع قوانين الاشتراكية العظيمة .. فطبعاً

الحكومة اخذت من الناس ممتلكاتها .. واللي

يهمنا احنا هنا المضارب والمطاحن والمخابز ..

لأن مضارب الرز كانت بتطلع السرس .. قشر
الرز يعنى اللي كنتو بتعملوا منه الورق مع
شجر الكازوارينا برة البلد .. تأمين المضارب
وجع كل عامل فى شركات الورق .. معظمها
فلست .. واضطرت الحكومة تشتري من برة
بخيرة الخبراء وعمولة العملاء ..

عباس : ده تاريخ .. خلاص .. ايه اللي نقدر نعمله
دلوقتى ؟

حمدي : نغير مسار شركة الورق بتاعتنا !

عباس : (يضحك فى مرارة) بتاعتنا ؟

حمدي : قصدي بتاعة الأسرة يعنى ..

عباس : أيوه أيوه قول .. نغير مسارها يعنى إيه ؟

حمدي : الشركة دي نشأت فى أواخر السبعينات ..
وتاريخها هو تاريخ الصفقات المريبة اللي كل
الناس كانت بتعقدها أيامها ..

عباس : صفقات إيه ؟

حمدي : صفقات من نوع صفقات الشماع بيه ..
ظاهرها قطاع خاص وحقيقتها قطاع عام ..
وعشان كده كانت قايمة على الرشوة والعملات
الأجنبية والعمولات والذي منه ..

عباس : إيه دخل ده كله فى اللي احنا فيه .. فى
القضية .. فى المحاكمة ؟

حمدي : خلينى بس أوضح لك . كل شركة هي بنت

العقد الابتدائي اللي بيضم اسماء المؤسسين ..
واحنا عشان اتنقلنا من اسكندرية لمصر الناس
زى ماتقول نسيوا نجا فرج غريب تماماً .. زى
مايكونوا ناموا وقاموا لقيوا قدامهم شركة ورق
جديدة اسمها .. شركة المناديلى للورق ..
واديحنا بقى لنا سنين عايشين فى هنا بعد
الناس مانسيت نجا فرج غريب ..
عباس : وانت خايف حد يفكرهم دلوقتى ؟
حمدي : البورصة ياسيدى ! اتقدم فى البورصة صاحب
شركة الطابية للورق عايز يشتري شركتنا
ويضمها لشركته !
عباس : لكن احنا حنرفض .. موش عايزين نبيع ! احنا
احرار ..
حمدي : موش دى المشكلة ياابا .. المشكلة ان الموضوع
لو اتعرض على لجنة الضم والاحتكار
حينبشوا الملفات القديمة ويكتشفوا القضايا
المركونة .. ويطلبوا نجا فرج غريب .. ويصروا
على إعادة محاكمته ..
عباس : يانهار أسود ومهيب .. طب والعمل ؟
حمدي : الحل جاهز فى الشنطة دى .. من غير ضم ولا
احتكار .. أنا عندي شركة نوونو أنشأتها فى
اسكندرية واسمها شركة مريوط للبوص المائي
.. ودى يقتصر نشاطها على استخراج البوص

من مية البحيرة واستخدامه فى مرحلة لاحقة
فى صناعة الورق .. فلو وافقت سيادتك ..
نحول ملكية الشركة الحالية إلى اسمى أنا ..
واهو اسمى زى اسمك ..
عباس : زى اسمى ازاي ؟
حمدي : مانا خليته مناديل بقى .. وسيبنا من غريب
دى!
عباس : كأنها وراثة ؟
حمدي : كأنه تنازل من أب لابنه !
عباس : وأنا اعمل إيه؟ أقشر بصل ؟
حمدي : ياخبر بابا .. ماكل حاجة حتفضل فى إيدك
انت زى ماهى .. داخنا حنعمل ورقة نقل ملكية
صغيرة قد كده .. لكن حضرتك زى ما أنت
فى مكتبك وفى بيتك وفى الحياة العامة ..
عباس : وأنت حتروح فين ؟ (مستدركا) قصدى مش
حتفضل معانا هنا ..
حمدي : والله يا بابا دى مسألة ثانوية تبقى نناقشها
بعدين .. المهم دلوقت ان مدير شركة الطابية
للورق يعرف ان شركة المناديل موش للبيع
وننتهز الفرصة ونعمل تحقيق صحفى بمناسبة
افتتاح مقر الشركة الجديد .. يبقى الأضواء
كلها بعدت عن الماضى .. واندفن الماضى
تماما .. باختفاء الأسماء التى ارتبطت بيه

عباس : كلام جميل .. لكن كلام .. زى حكاية الاسماء

.. الدنيا كلها أسماء وكلام ..

حمدي : أمال احنا بنعمل الورق ليه يابابا انت نسيت ؟

عباس : دانت ما بتنساش حاجة أبداً .. ياساتر

(يضحك وقد هداً نفسياً) إن شاء الله بكرة

تعدى على فى الشركة نحضر النماذج

القانونية عشان المحامين يشوفوا شغلهم ..

حمدي : كده برضه يابابا ؟ المحامين ؟ واللى واقف

قدامك ده مش محامي ؟

عباس : أيوه لكن ..

حمدي : مالكنش .. (يفتح الحقيبة) اتفضل .. امضى

هنا ..

عباس : امضى .. دلوقتي .. (مذعوراً) ازاي ..

حمدي : هنا على الخط المنقط .. (يتجههم وجهه)

اتفضل وأدى القلم ..

عباس : لكن أنا ..

حمدي : امضى .. (بحدة وقسوة) امضى يابابا ..

عباس : (يمضى) كده ؟

حمدي : وهنا .. وهنا .. وهنا .. وهنا .. وهنا ..

عباس : كل دول ؟

حمدي : لازم .. أمال احنا بنعمل الورق ليه .. انت

نسيت ؟ (يضحك)

عباس : (يضحك ضحكة صفراء) على رأيك .. هيه ..

الحمد لله .. اتفضل .. حنتعشى سوا ضرورى

.. مش كده ؟

حمدى : لا موش النهاردة لان عندى مشاوير .. بس

حتشوفنى كثير ماتخافش ..

(يخرج)

(إظلام)

(إضاءة)

حمدى : (جالسا على المكتب) مين ؟ أيوه اتفضل

(يفلق الإنتركوم ويهيب واقفاً ويجرى للترحيب

بسناء)

أهلاً سناء أهلاً .. اتفضلى اتفضلى ..

سناء : آمال بابا فين ؟

حمدى : يعنى بدمتك موش عارفة ؟ (يضحك) فى

الموقع !

سناء : ما قلتيش .. إيه حكاية الموقع دى ؟

حمدى : قوليلى انت الأول .. إيه الحلاوة دى ؟

سناء : حمدى وبعدين .. احنا اتفقنا على إيه ؟

حمدى : على إننا سَكِّمُ بَكُمُ لحد مارينا يريد ..

سناء : وداخل فيها الحلاوة ؟

حمدى : وداخل فيها البقلاوة ! تعالى ياست الكل تعالى

اما اشرح لك عملنا إيه .. بحيرة مريوط ..

سناء : مريوط إيه وإدكوايه ؟ انت حتاخذنى فى دوكه ؟

قوللى عملت إيه مع بابا وفهمته إيه وهو فاهم

إيه ؟

حمدى : شوفى .. الأستاذ سليمان زكريا بتاع التمثيل
أحسن مدرس فى الدنيا .. علمنى البوزات ..
يعنى ايه ؟ يعنى ازاي الواحد يقف كده
(يلوى جسده) أو كده .. وازاي الواحد
ينظم إيديه وهو بيتكلم (يريها نماذج) كده
وكده وكده ..

سناء : وده دخله إيه باللى قلتوه ؟

حمدى : هو ده اللي قلناه !

سناء : اشمعنى !

حمدى : حتخشيلي قافية ؟

سناء : يا حمدى احنا رتبنا كلام معين .. ورسمناه

رسمة معينة .. وواضح ان الحمد لله النتيجة

كويسة .. يعنى فى صالحنا ..

حمدى : لا .. فى صالح الجميع .. وفى صالح بابا
أولاً ..

سناء : موش فاهمة .. انت موش خدت الشركة ؟

حمدى : اسمعى ياسونة يا حبيبتى .. بابا موش مغفل ..

من أول لحظة كشفنى وعرف انى موش ابنه ..

سناء : ازاي ؟

حمدى : قال لى يابنى يا حبيبتى !

سناء : وبعدين ؟

حمدى : ولا قبلين .. قلت نكمل اللعبة ! عطيت له كل

المفاتيح اللي ممكن يكشفنى بيها .. مثلاً إنه

ماكانش يعرف ان عطية هانم حامل .. أو كان

يعرف وطنش ..

سناء : إزاي ؟

حمدي : لحت له أن المذكرات اللي حصلت عليها وقفت

عند الحتة دي .. وده معناه أن أنا ماشفتش

الكراسة الثانية اللي بيحكى فيها خبر ولادة

سنا وتأميم المضرب وهجرته لمصر مع الأسرة

الصغيرة .

سناء : طب وغرضك إيه بقى ياناصح ؟

حمدي : واضحة زى الشمس ! انه يضحك فى سره

على ؟ ويقول لوكان هذا الدعى شاف الكراسة

الثانية كان عرف ان المولود بنت وكان ربح

نفسه .. (يضحك) وتلاقىه كان فعلاً

مدبرمواجهة معانا كلنا .. احنا الثلاثة ..

وبرضه بطريقة سليمان زكريا .. تخش طنط

عطية هانم ومعاه سناء هانم وهو وراهم

ويروح قايل لى بصوت زى الجونج .. أدى

مامتك يا حمدي .. وادى حمدي ! ويشاور

عليكى ..

سناء : أما انك عفريت صحيح !

حمدي : وعلى فكرة هولسة ممكن يعمل العملية دي !

سناء : لا ! فات وقتها بقى !

حمدي : بالعكس .. ده تلاقىه زى بتوع الأدب عمل لها

عنوان « الورقة الأخيرة » والا « الكراسة
الأخرى » والا « سناء هي حمدي »
سناء : لا .. بايخة الأخرانية دي ..
حمدي : شوفي ياسونة .. احنا قدرنا واحد .. اتولدنا
في عام الاشتراكية المجيدة .. فاستولت الدولة
على أملاك الشعب خوفاً على الشعب من
استغلال الشعب ..
سناء : لما دخلنا الكلية كانت الدنيا اتغيرت وكنا بنقرا
ده زى التاريخ .. من غير إنفعال ..
حمدي : بالعكس .. أنا عمري ما انفعلت أكثر من يوم
ما قلتيلي ان بابا محكوم عليه حكم غيابي
عشان لقوا معاه فلوس !
سناء : أيوه .. لكن فلوس أجنبية ..
حمدي : أه .. يعني بطيخ !
سناء : (تضحك) ما القانون كان كده أيامها ..
حمدي : خلاص .. والقانون ما بقاش كده .. يبقى
سقطت التهمة تماماً ..
سناء : الله .. آمال ماحدش قال ..
حمدي : عيب ياسناء داحنا خدناها في سنة ثالثة !
سناء : أنا أقصد يعني ماحدش قال لبابا بيرا نفسه
ويظهر حقيقة اللي حصل - ويكشف موضوع
الشماع بيك الله يرحمه ..
حمدي : نوع من رد الاعتبار يعني ؟

سـنـاء : طبعاً !
حمـدى : والله ياسونة لو كان حاول كان نجح .. لكن بابا
أولاً كبير .. وثانياً زى ماتقولى انضرب ضربة
جامدة من ناس كان بيحبهم ويناصرهم ..
عشر سنين من ١٩٥٢ لـ ٦٢ وهو مجند بحرى
وقبلى لتأييدهم ..
سـنـاء : بس تفكر كانوا حيسنتنوه ؟ حيقولوا له خلّى
لك انت المضرب عشان قشر الرز ؟
حمـدى : الحمد لله .. أنا النهاردة بانتقم لبابا من
سنوات الذل .. وديته الموقع !
سـنـاء : اللى حنعيش فيه ؟ بيت الأحلام ؟
حمـدى : بكل أسف ماينفعش ! دى المياه الراكدة فى
بحيرة مربوط اللى ماليتها البوص والأعشاب ..
سـنـاء : وده موقع إيه ان شاء الله ؟
(تدخل عطية هانم ومعها رجل قصير)
عطية : مندوب البنك يا حمدى يابنى .. ماقدرش
يستنى ..
حمـدى : أهلاً أهلاً بابو راسين .. ازيك كده ياد ؟ يخرب
بيتك .. أنت غطست فىن ؟
عليـوة : ازيك ياميتير .. والله واحشنا .. أنا فى البنك
الصناعى دلوقت ..
حمـدى : عال عال - وخلصتنا السلفة ؟
عليـوة : (مخرجاً ينظر إلى عطية وسناء) أصل
حضرتك ..

حمدي : ايه ياد الحركات دي .. مانتكم .. مكسوف م
الحريم والا ايه ؟ مراتي وحماتي !
عليوة : مش موضوع حريم ورجال .. أصل سيادتك
باعت لى ورق -
حمدي : أمال حابعت لك كوسة ؟ طبعا حابعت لك ورق
.. هيه .. خلصنا ..
عليوة : لو اقدر ألكم سيادتك على انفراد ..
حمدي : سبحان من جعلك تتكسف ! هيه (يأخذه
جانبا) قول !
عليوة : (هامساً) السلفة واقفة عشان مافيش ضمان !
حمدي : (بصوت جهورى) والشركة الطويلة
العريضة دي .. مش ضمان ؟
(يدخل عباس منهارا ويطالب بكوب
ماء)
سناء : سلامتكم يا بابا .. لحظة واحدة
(تخرج)
عطية : (تسائده) سلامتكم يا عباس .. ايه اللي
حصل ؟
عباس : قتلوني ولاد الكاب ! دبحوني فى عز الظهر
حمدي : لاحول ولا قوة إلا بالله .. ايه ياخوانا اللي
جرى النهارده ؟
عباس : كام دايين ما يجيش مجموع دينهم ٤٠ الف
جنيه رفعوا قضية بروتستو وكسبوها !

(تعود سناء بالماء)

بروستو ده يطلع ايه يا حمدى يابنى ..

(حمدى لايرد)

سناء : معقولة دى ؟

عطية : ماتقولوا .. ماتفهمونى !

عباس : فُلَسْ يا عطية .. قضية افلاس .. عايزين

يشهروا افلاسى ويبيعوا أصول الشركة دى

وممتلكاتها عشان يسددوا الدين ..

عطية : طب دى الشركة ولا بمليون جنيه ..

عباس : ما هم حبيبعوها لنفسهم الحرامية .. الأردال ..

صيده ولهفوها ...

حمدى : وأنت ايه اللى خلاك تستلف من المرابين دول

يا بابا ؟

عباس : أنت مش عايز تتجوز سناء والا إيه ؟

حمدى : يانهار موش فايت طبعاً .. ليه ؟

عباس : يبقى خليفها باعنى أحسن !

عطية : قصده يقول لك إيه اللى لك عليهم ؟

عباس : أيام الأزمة كنت باحتاج لفلوس سايه والبنوك

كانت مقفلة .. كانت أيام سودة ..

سناء : أهم كانوا بياخدوا ممتلكات الناس لصالح

الدولة والا الحكومة .. لكن الشياطين دول

بيقتلوا فى عز النهار .. ولصالح مين ؟

عليوة : (إلى حمدى) خدت بالك نيافتك م

الموضوع ؟

حمدي : الله يخرّب بيت نيافتك على نيافة اللي ابتدع

النظام ده !

عليوة : خليكو معاً لحظة واحدة .. أنا عندي رجالتي

فى البنك ممكن يدفعوا بدال المية ألف من باب

الشهامة والمروءة .. مانعارضش البرتستو ..

ماندفع لهمش ديونهم .. ونعمل مزاد .. عادى

حمدي : يابن اللئيمة ! وأنا كمان حاخش فى المزاد ..

أنا وكل شلتي ..

عليوة : واللى بعشرة نخليه بعشرين يقوموا يعرفوا

أنهم اتوكسوا وخابوا ..

عباس : وليه ؟ وإن طلع حد حيشترى جد بيعوها له !

جتها البلا من يوم ما أنشأتها !

حمدي : أنا شخصياً ماليش علاقة بالرز ولا بقشره من

يوم ورايح .. كل علاقتى باليوص والأعشاب

اللى فى مريوط .. أهى منها أنصّف البحيرة ..

مين عارف ؟ حد فينا يحب يصطاد ؟ ومنها

أخذ المادة الأولية للورق مجاناً !

عليوة : بس فيه شرط مهم قبل ده كله ..

حمدي : ايه يابوراسين ؟

عليوة : تشوف لى عروسة أنا كمان ..

حمدي : وأنت حد ممكن يبص لك ؟

عليوة : يبقى خارج فى كلامى !

حمدي : لحظة واحدة .. سناء .. هى خالتك منصورة

السودة اتجوزت ؟

سناء : لسة ياحمدى ..
حمدى : خلاص .. مدام عطية .. عطية هانم حتكلم لك
أختها ..
عباس : نبعثوا نجيبوها من دمنهور .. أصلها لازم حد
يسندها فى المشى ..
عليوة : بتقولوا سوده ؟
حمدى : أيوه أيوه يامغفل .. اسم الدلع .. مش يعنى
سودة .. !
(يدخل شخص هرم ويتوقف فى دهشة)
(أهلا بابا .. تعالى اعرفك ع العيلة ..
(همهمة وتساؤل)
أعرفكم يا جماعة بالاستاذ عباس المناديلى
الأصلى .. دا يابابا نسيبى .. صهرى والد
سنا .. عباس المناديلى برضه ! ودى مراته
عطية هانم غزال ! وده عليه أبو راسين ..
زميلى طول عمرى ورئيس فريق الكرة
الشراب فى حارة دعبل فى دمنهور ..
عباس : إيه الحكاية ياحمدى ؟ والدك ده صحيح ؟
حمدى : مستكتر على أب بحق وحقيق ؟ معظم الناس
لها أبهات وأمهات !
سناء : وبقى قرايب بقى !
حمدى : قرايب ازاي ؟ تبقوا حرامية ! يعنى يوم ما
ابوكى حب يستلف اسم بيعده عن نجا فرج

غريب .. مالقاش غير عباس المناديلي ؟ وعشان
كده أول سؤال سألتهوك فى الكلية .. فاكرة
كان ايه ؟

سناء : انتو مدين ؟

حمدي : ولا طلعتو من دمنهور اطمنت ان احنا مش
قرايب .. وفضلت أسال واشقر لحد ما ..

عباس : عرفت الحقيقة ..

حمدي : لا .. وقعت فى غرامها .. وبالعافية لطشت
الكراسة الأولى ..

عباس : وأنا .. موش حقدوني فرصة أتكلم ؟

حمدي : فى المسرحية الجايه يا بابا .. المسرحية دى
خلصت ! باى باى !

(اظلام)

قصة منزل
مسرحية من فصل واحد

ابو قصر قديم من العصر التركي أو المملوكى -
الى اليمين منظره (مدرّة / منضرة) أى مكان انتظار
الرجال ، وإلى الخلف الحديقة وهو مكان النساء ،
والى الشمال السلالمك حيث يصعد الى الطابق
الاعلى من بريد النوم . هنا وهناك مقاعد ومكاتب
وفرائض وأبواب فى الجدران ، وجدار ومكربيات تنمو
فيها النباتات ، وهنا وهناك نجفات تتدلى من السقف
أو الجدران موقدة بشموع كثيرة . قرب المدخل موزن
والى جانبه إبريق فيه ماء مغطى وقروانه فارغة .

(عندما يضا ، المسرح يدخل متولى وهو شاب فى
معمان العمر وراه اثنان رجل عجوز هو شبيبور
يمسك مسيحة ويلبس ليس أبنا ، البلد . ورجل فى
متوسط العمر يلبس جلباباً عليه هاكنه وطربوشاً تحته
مديلى وهذا ، وهو رباً ويمسك دفترأ وقلمأ . الوقت
نهاراً والجويومى بالتاريخ - نقوش الجدران
الاسلامية القديمة وزخرفة الخشب فى المقاعد
والأثاث عموراً وأنواع السجاهيد العجمى)

متولى : بسم الله الرحمن الرحيم والحمد لله رب
العالمين .. وخلصنا من الجولة فى أرجاء المنزل
شهبور : توكلنا على الله الكريم ! (يكح فيسرع إليه
الشباب عاصى ويسنده)
عاصى : سلامتك عمى شهبور .. أجيب لك فيه ؟
شهبور : لا لا لا .. أصل التراب تعب مناخيرى وانت
عارفنى ماعدش استحمل ..
عاصى : طب حط منديل على بلك .. كلها دقائق ونمشى
شهبور : موش ممكن يعجبه ..
عاصى : زيه زى اللي قبله .. هيه ! ايه رأيك يا أستاذ
متولى ؟
متولى : رأيى فى ايه ؟ فى البيت ولا فيكم ؟
شهبور : افتح الشباك يا عاصى ..
عاصى : فى الاتنين !
متولى : رأيى انه تحفة وانكم مجانيين !
عاصى : ايه الحكاية دى ؟ عجبك ؟
متولى : دأ اثر تاريخى خسارة يتاجر !
شهبور : ياريتيه كان اثر تاريخى كنا عرفنا نكسب من
وراه قرشين !
عاصى : أصل مصلحة الآثار لا تعترف باثر مامضاش
عليه ميت سنه !
متولى : حتى لو كان بالشكل ده ؟ ممكن تأجروه لبتوع
السينما .. الأفلام التاريخية والحاجات دى

شهبور : ماهو ما تقدرش نؤجره كآثر تاريخى للسيما

والا لعفريت أزرق إلا بتصریح ..

متولى : ماشى ! اتوكلنا على الله .. عايزين كام فى الشهر ؟

عاصى : لاه .. دى مش مهمة قوى .. المهم هو انه حينور وحيثتضف ويبقى بيت بنى آدمين

شهبور : مش بيت عفاريت ! (يعود إلى الكحة)

متولى : من الناحية دى ماتخافوش ! أنا عندى اللى

ينضفه ويغسله ويلمعه ويخليه زى الفل .. أنا

بس عايز يومين تلاته أنقل فيهم وأشوف

حاعيش فين - يعنى أعمل لى أودة مكتب وأودة

سفرة وأودة تلفزيون غير أودة النوم والحمام

.. لأنى لاحظت ان النظام هنا قديم جداً .. وده

لا يتمشى أبداً مع احتياجاتنا العصرية ..

عاصى : يابيه احنا تحت أمرك .. ما دام أنت اللى

حتصرف .. خلاص ..

شهبور : (يضحك فيكح) يعنى لازم تحطها على بلاطة

كده ؟

عاصى : متولى بك أستاذ كبير .. ومش معقول واحد

درس التاريخ وبيدرسه يجهل قيمة الفلوس ..

متولى : لا ماتخافوش .. موش حاكلكم ملیم واحد !

عاصى : وعلى فكرة ممكن كل ده ينخضم م الإيجار ..

متولى : إنما (يخطر له خاطر مفاجئ) إنما .. ليه

مابتهدوش البيت وتبيعوا الأرض مثلاً ..
(يتدارك نفسه بسرعة) أه .. لازم حكر ..
طب وماله .. ابنو انتو مطرحه إذا كات الأرض
حكر .. أه .. يمكن ما عندكوش فلوس كفاية ..
بس دى حلها سهل ..

شهبور : حاولنا يا بنى كثير !

متولى : حاولتو إيه .. تهدوه ؟ عُصَلج ؟ زَرَجَن ؟ يا عم
شهبور أنت بتكلم أبناء القرن العشرين ..
صحيح مش حنهده بديناميت زى فى أمريكا ..
لكن بنشيله طوبة طوبة زى ما بنعمل فى البيوت
الأثرية فى مدينة رشيد .. حتلاقى هناك أحسن
ناس تهد وأحسن ناس تبني .. حتلاقى أحجار
من عصر الفراعنة فى حيطان بيوت الممالك !
نفس الطوب ونفس الحجر بيتشال من البيت
القديم ويتحط فى البيت الجديد ! أوعدكم إذا
كنتو عايزين .. فى أقل من سنة ..

عاصى : عم شهبور حاطط فى باله مسألة الوريثة
وعدهم الكبير .. اللي مات واللى سافر !

شهبور : أنا قلبى انفتح لك يا متولى وموش حاخبي
عليك .. (يكح) احنا حاولنا نهد البيت كذا
مرة .. وكل مرة تحصل حادثه مالهاش تفسير ..
حادثه تجبرك على التوبة إلى الله سبحانه
وتعالى ..

متولى : أسف يا عمى .. بس التوبة دى فى كل وقت ..

ويا ريتنا بنتوب بصحيح !

شهبور : التوبة يعنى العودة يا بنى .. يعود الإنسان إلى الله العلى العظيم ويقول له أمرك .. مادامت هذه مشيئته .. خلاص ..

متولى : قصدك حوادث عارضة خلّتك تفهم ان ربنا موش عايزك تهد البيت؟

عاصى : كان لزومه إيه فتح الملف ده دلوقتى ؟ احنا موش خلصنا منه خلاص ؟

متولى : وماله يا عاصى يا خويا .. احنا ربنا عرفوه بالعقل !

شهبور : انت أصلك ولد عايش بالظاهر .. مابتشوفش الباطن ..

متولى : طب قول لى يا عم شهبور .. شوقتنى ..

شهبور : أول مرة جينا نهد البيت .. من كام سنة كده ..

عاصى كان لسه جديد معاى فى المكتب ..

والعامل اللي كلفناه بخلع أول شبك فضل

واقف بيص لنا من فوق .. م الدور الثالث زى

ماحضرتك شايف .. إيديه متسمرة وعينه

واسعه على الآخر زى مايكون شاف عفريت ..

وجسمه (يكح كحاً شديداً) جسمه ..

متصلب زى لوح الخشب .. لا مؤاخذه .. وبدأ

يميل يمين وشمال ..

عاصى : أنا اللى اتقذته ياعمى !
شهبور : مضبوط .. فى لحظة عاصى كان جنبه وفضل
معاه لحد ماتركه سليم ..
متولى : والدكتور قال إيه ؟
شهبور : دكتور مين ؟
متولى : ماكشفش عليه دكتور بعد كده ؟
شهبور : يكشف على إيه يابنى ؟ دا مجرد مانزل صار
زى الفرس الجامح .. صحة إيه وقوة إيه ..
متولى : كان لازم دكتور يشوفه برضه !
عاصى : ماهو شافه يا أستاذ متولى .. بعدين يعنى .
متولى : فى حادثة ثانية ؟ والا لما تعب تانى ؟
شهبور : ياريتك كنت شففته يامتولى يابنى .. أصلك
(يكج) لا إله إلا الله .. موش مصدقنى ..
متولى : بالعكس .. أنا مصدق كل كلمة .. لكن .
الواضح ان الراجل كان تعبان وكان لازم
تشوفوا غيره .. مش تقولوا البيت مش عايز
ينهد !
شهبور : (يضحك) خلاص .. فتك بعافية .. أما تلاقى
عندك وقت أبقي عدى ع المكتب امضى عقد
الايجار ..
عاص : مش حنقوله ياعمى ع الـ .. الاشاعة ؟
شهبور : أيوه صحيح ! أهل الحنة بيقولوا انهم فى
بعض الليالى .. (فى تردد) ساعات يعنى ..

متولى : (مقاطعا) ييسمعوا أصوات فى البيت

ويشوفوا أنوار .. وإن ده لازم يكون معناه

وجود عفريت .. أو عفاريت !

عاصى : (فى حالة من الذهول) حضرتك .. سمعت

ياعمى .. الأستاذ متولى ..

شهبور : يمكن دمه زفر يابنى ومايقدرش يشوف اخوانا

بسم الله الحفيظ ..

متولى : (يضحك ببشاشة حقيقية) والدم الزفر ده

من أكل اللحم والطيور مثلاً ؟

عاصى : يالله بينا ياعمى ..

شهبور : فتنك بخير ..

متولى : لازم تشرفونا عشان تشوفوا التعديلات فى

العقار .. مع السلامة ..

(يخرجان)

يامانت كريم يارب .. بقالى سنين بادور على

سكن أهرب فيه م المدرسة دى .. وكل مايطلع

لى حاجة ألاقى غول الفلوس فاتح بقه عايز

يلتهم .. ويزدرد .. وبيتلع .. الحمد لله رب

العالمين .. بيت كامل ثلاث ادوار .. والإيجار ؟

(يضحك سعيداً ويدور حول نفسه

راقصاً) يخصم من نفقات تحسين العقار !

وآد يحنا سكننا واترستقنا وبقينا عال العال ..

أبعث بقى الولاد بالشنط على كارو محترمة ..

وبعدين ينظموا عملية التنضيف والتنظيم .. هم
عيال سنة ثالثة اللي يقدروا يسدوا .. ونجييوا
سندوتشات مشككة .. لكل ولد واحد بتتجان
وواحد فول وواحد طعمية طول أيام العمل ..
وأخر يوم ريع كباب فى رغيقين مع سلطة
طحينة .. أه .. دول بيموتوا فى الطحينة
.. ويبس م الكبيرة .. بس لا .. برضه نجيب
برتقان وموز .. ما يستغناش الأمر .. العملية
حتاخذ لها ثلاث ايام .. قول اربعة .. يبقى
اعمل حسابى أبات هنا يوم الخميس الجاى ..
ويوم الجمعة بعد الصلا أعمل حفلة شاي
للفصل كله .. أمال .. مافيش احسن من
اللاجيس Largesse - الأريحية ! أمال ..
ايه ! وبعدين مادام البيت جهز والواحد
بيمشيها للمدرسة .. يبقى نفكروا بقى فى
العروسة - وَّه يامتولى ! حاجة حاجة أحسن لا
تطول عروسة ولا جاموسة ..

(الباب الخارجى يطرق طرقة شديداً)

متولى : (يفتح الباب) خير يابنى .. فيه ايه ؟

عطوة : خير يابيه .. سلامتك !

متولى : سلامتى ؟ إيه الخط والرقع ده كله ؟

عطوة : أنا خبطت ورقعت ؟ دانا يدوبك شخسخت
الحديدة !

متولى : يمكن الصوتيات بتاعة البيت غريبة .. نهايته ..

خير ؟

عطوة : خير يابيه .. كل خير .. دانا محسوبك عطوة

عليان صاحب محل البقالة والفاكهة والخضار

اللى قدام سيادتك .. وعندى تليفون ..ولين

طازة كل يوم وزياى طازة .. واهل الحنة

زيان عشرة وحياة النبى .. قلت أرحب بيك

واقول لك دا يوم المنى لما البيت يتسكن ..

عاملين لامؤاخذة شغلانة وهلولة على حكاية

بسم الله الرحمن الرحيم اللى بيفزوا بالليل ..

أمال بس حيفزوا امتى ؟ وبصراحة طول ما

احنا مشغلين القرآن ما بيجوش ناحيتنا

متولى : أنت بتتكلم بسرعة خمسين كلمة فى الثانية

وانا مش قدك .. لكن برضه نوضح المسائل ..

انت جاي ترحب بزبون جديد والا تخوفه من

بسم الله الرحمن الرحيم؟

عطوة : أخوفه ؟ ليه لا سمح الله .. دانا بافرح والله كل

ما الحنة تعمر والناس تكثر .. وبعدين احنا لا

نخوفهم ولا هم يخوفونا .. احنا مالنا ومالهم ..

سيادتك متقف ومش حتسمع كلام الجهلة ..

يقول لك يخوفونا .. يخوفوا فينا إيه ؟ طب دانا

شفت فرخ جن داك النهار قرب صلاة العشا

.. صدق بآيه ؟

متولى : أمنت بالله !
عطوة : قعد يرتعش وبقي منظره نكته .. خفت ليهرَّ بيل
السمسم بتاع الحداد رحت قارى عليه اسم
الله حرقتة .. آمال يا أستاذ متولى «يجد له
شهاباً رصداً» صدق الله العظيم .. آه ..
وما فيش أقوى من اسم الله ..
متولى : أمنت بالله .. خلاص ؟
عطوة : خلاص إيه يامتولى بيه .. دانت نورت الحنة
بنور العلم .. وأنا ان شاء حنجيبوا كلوب ميت
شمعة نولعوه على باب الحارة طول الليل ..
متولى : مالوش لازمة ياعطوة ياخويا .. إن شاء الله أنا
حاخلى لمبة كهربا مولعة ليل ونهار على باب
البيت .. ولا يهكم ..
عطوة : خلاص يابيه .. وهو كذلك .. الراتب بقى على
كيلو والا نص ؟
متولى : الراتب ؟
عطوة : اللين ؟
متولى : مين قال إنى حاخذ لين ؟
عطوة : أهل البيت .
متولى : ما فيش أهل بيت لسة .. أنا لوحدى ..
عطوة : أبعت أنا الخضار والبقاله ع النوتة ونبقى
نتحاسب بعدين ..
متولى : ماتبعتش حاجة ياعطوة أرجوك ..

عطوة : ودى تيجي يانوار الحارة .. سلامو عليكو ..

(يخرج)

متولى : أنا موش حاضيع وقت .. ع المدرسة عدل اتفق
مع الولاد .. ويكره الصبح تكوت كل حاجة
انتقلت .. هه .. وأدى المفتاح ..

(يخرج)

(بمجرد أن يخرج نسمع ضجة رهيبة

كانها ضجة سقوط جسم ثقيل من سطح

إحدى العمارات . وتسمع الأصوات

التالية)

صوت ١ : حاسب يامتولى !

صوت ٢ : دماغك يامتولى !

صوت ٣ : يا حول الله يارب .. مات متولى ؟ متولى أفندى
مات ؟

(إظلام - إضاءة)

موسى : إيه رأيك يامتولى أفندى ؟

متولى : وكلفتنا أقل ..

موسى : وشلنا لك كل الطوب المرصوص فوق السطح ..

متولى : واللى بيوقع بالصدفة ع اللى خارجين ؟

موسى : لأ .. دكة كات حادثة بسيطة .. ورينا ستر ..

موسى : أعقلها وتوكل ياموسى ..

متولى : يا أستاذ دى كانت حادثة زى حوادث التاريخ ..

موسى : سيادتك اللى معلمنا الكلام ده بالحرف ..

معنى القصد ومعنى المصادفة ..

متولى : القصد والمصادفة هم مشكلتى النهارده ..
موسى : كام فى المية قصد .. وكام فى المية مصادفة ! ؟
متولى : الحمد لله ان احنا استقرينا ونقدر نرتب أمور
الدفعة بتاعتكو ..
موسى : مانت عارف يامتولى أفندى .. كلنا تقريباً
حنشتغل .. ماחדش عنده فلوس يروح جامعة ..
وأقرب جامعة مننا بتاخذ مجاميع عالية ..
متولى : بلاش اسكندرية ياسيدى .. فيه جامعات
اقليمية تانية تقبلكو .. لكن خسارة تسيبوا
الدراسة فى النص والبلد محتاجة لمعلمين ..
موسى : (فجأة) أنا حلتها يا فندى !
متولى : موسى .. موسى .. مالك ؟
موسى : فاكر الكلام اللى كان مكتوب على الرخام اللى
فى الحمام الكبير ؟
متولى : الناقص ؟
موسى : جبت بقيته !
متولى : برافو عليك .. ايه هو ؟
موسى : اللى مكتوب هو الشطر التانى من بيت والشطر
الأول من البيت اللى بعديه ..
متولى : يعنى اللى ضايع الأول من الأول .. والتانى من
التانى ..
موسى : ودول موجودين فى مسجد أبى النظر فى رشيد

متولى : عارفه .. بنسموه أبو مندور ..

موسى : يبقى البيتین علی بعض هم :

شاد الخدیوی مسجداً لأبى النظر

یابخت من بمقامه لاذ

سعدوا بمقدمه فقلت مؤرخاً

عباس شید مسجدى هذا

متولى : برافو عليك يا موسى .. عارف (فجأة) احنا

ممکن نحدد تاریخ بناء المنزل ده بالضبط ..

ويمكن له قيمة أثرية .. وإذا قدرنا نعمل العملية

دى .. نعينك هنا بالثانوية بدال ما تروح الغيط

مع عمك ..

موسى : إزاي؟

متولى : الشطر الأخير مكون من ٢٥ حرف وكل حرف

له قيمة عددية حسب النظام القديم .. أبجد

هوز حطى .. كل حرف من دول يرمز لرقم من

١ إلى ١٠ - اللي هي اليا - وبعد مسألة جمع

بسيطة .. اجمع قيمة حروف (عباس شید

مسجدى هذا) يطلع ١٣٠٦ بالهجري طبعاً ..

وعباس هو الخديوى عباس حلمى الثانى ..

أفندينا !

موسى : بس إيه العلاقة بين الرخامة دى والرخامة دى؟

متولى : يا إما الخطاط غلط فعادها من جديد ..

والقديمة فضلت هنا ..

موسى : يا إما وزير الإعلام بتاعه كان بيعمل عملية نصب!

متولى : ما كانش عين وزير إعلام!

موسى : يعنى .. واحد محضر له كام رخامة وعليهم انصاص ابيات .. إذا بنى جامع يبقى «شاد الخديوى مسجداً» .. وإذا بنى بيت يبقى « شاد الخديوى منزلاً ... »

متولى : وإذا ما بناش؟

موسى : أهو يستخدم الرخام بالكلام الناقص في البنا .. يعنى حد حيحقق معاه ..

متولى : انت ولد عيقرى!

موسى : أنا متهايا لى ده اكتشاف قديم وعمره ما حايهم حد ..

متولى : حيهما احنا يا موسى .. حيهما كل مهتم بالتاريخ ..

موسى : فى إيه؟ يعنى المبالغات دى جزء من تراثنا واحنا واخدين عليها !

متولى : المبالغات شئ .. والمغالطات التاريخية شئ ..

لو خطاط كتب «منزل» بدال «مسجد» يبقى معنى كده ان تاريخ البنا كان ١٣٠٠ مش ١٣٠٦! يعنى تبقى كل البيوت اللى بناها الخديوى اتبنت قبل المساجد بست سنين! وقس على ذلك الحاجات الثانية بقى!

موسى : يا اولاد الياه ! وما فيش طريقة نتحقق بيها غير كده؟

متولى : يا ريت يا موسى يابنى .. إلا إذا !

موسى : إلا إذا؟

متولى : إلا إذا لقينا مخبأ سرى فيه نصوص مكتوبة .. أو رخامات منحوتة ..

موسى : وده ممكن لو اتهد البيت ..

متولى : أصحاب البيت رأيهم أنه مستحيل هدمه ..

يعنى عليه سحر أو شئ من هذا القبيل ..

موسى : بيقولوا الجن بتحميه .. وده مش معقول!

متولى : فيه إيه يعنى عظيم عشان تحميه؟

موسى : ممكن يكون فيه وما نعرفش ..

متولى : يبقى نشتره .. ربنا يدينا .. ونهده ..

(بمجرد أن يقول هذه الكلمة تسمع ضجة رهيبه كصوت ارتطام بالأرض)

موسى : انذار يا متولى افندى

متولى : ماشى .. وأنا قبلت الانذار!

(إظلام وإضاءة خافتة - ليل)

متولى : (داخلاً) بسم الله الرحمن الرحيم .. توكلنا على الله الكريم ..

(منادياً) واد يا شعبان .. شعبان .. لكن

حيسم إزاي وهو لازق قدام التليفزيون؟!

(بصوت أعلى) ولدا! شعبان .. شعبان..!

شعبان : (داخلاً) إيه يا أسطى متولى.. خير؟

متولى : انت نايم واللا صاحى؟

شعبان : صاحى ياسيدى

متولى : أستغفر الله .. ما تقولش يا سيدى أبداً فاهم؟

شعبان : حاضر يا أستاذ .. عايز حاجة؟

متولى : أنا عايز أظمن عليك .. اسمع مش فاكرا ان

كنت قتلتك قبل كده والا لا .. أنا بكره عامل

عزومة كبيرة وموصى أبوهاشم الطباخ يجيب

الأكل جاهز فى صوانى .. خللى بالك .. دى

أول مرة باعزم ناس عشان كده مش حانعرف

الأكل .. حنحطه زى ما هو على السفرة ..

الضيوف حياخدوا زى ماهم عايزين والباقي

يفضل فى الصوانى .. مفهوم؟

شعبان : مفهوم يا أستاذ ..

متولى : أنا وانت حانشيل الأطباق والصوانى ع

المطبخ .. وانت حتعمل الشاى لوجدك ..

شعبان : أيوه يا أستاذ ..

متولى : أيوه ايه؟ تعرف تعمل شاى لكل الضيوف دول؟

شعبان : أنا كنت ياعمل عند معلمى شاى لكل

الصيادين اللي فى المنشئ..

متولى : (يضحك) ياخبر! لهونا عازم المدرسة كلها والا

إيه؟

شعبان : باقول أنا تحت أمرك يعنى..

(يدق الباب)

متولى : اتفضل! أصل انا عمري ما اقفل ابواب ولا

شبابيك إلا قبل النوم!

شعبان : أى خدمة ثانية الليلة؟

متولى : هو انت ناوى تنام على طول مش يمكن الضيف

يجب يقعد نعملو له شاي؟ (إلى الطارق)

اتفضل .. ده لازم عطوة البقال..

شعبان : أستنى أخذ الحاجات؟

متولى : لا .. أنا حاتصرف! اتفضل انت .. (يخرج

شعبان) .. الباب مفتوح يا أخ .. والبيت بيتك..

(يبحث فى منطقة المكتبة عن كتاب -

كأنما يريد أن يهديه بصفة خاصة إلى

عطوة)

الطارق : سلامو عليكمو ..

متولى : مين ؟ عطوة ؟

الطارق : عطوة مين يا أستاذ ؟

متولى : عطوة البقال .. أنا كنت منتظر بيعت لى شوية

حاجات .

الطارق : تحب أعدى عليه أشوف اتأخر ليه ؟

متولى : انت بتشتغل عنده ؟

الطارق : لا أبداً .. بس ولاد حته ولبعضينا ..

متولى : يا أخى ألف شكر .. لا .. ما تتعبش نفسك ..

اتفضل اتفضل .. يامرحبا ..

الطارق : أنا أسف يا أستاذ متولى اللي جيت في وقت متأخر كده بس حاسم إيه .. واحد من تلاميذك الظاهر زعل أصحاب الوقف .. قاموا اشتكوه للمنطقة التعليمية ورفدوه على طول ..

متولى : ياساتر .. دا لازم غلط غلط كبير قوى .. مين ياترى الواد ده وياترى عمل إيه ؟

الطارق : الواد اسمه موسى عيسى .. تصور ! يعنى اسمه يوحى بالتقوى والصلاح !

متولى : موسى عيسى ده ولد مجتهد مؤدب ! ياترى عمل إيه ؟

الطارق : يبدو أنه نشر في مجلة من المجلات إياهم مقالة بتسمى لسمعة أصحاب الوقف .. ورئيس العائلة الخطاط الكبير .. الأستاذ النواوى ..

متولى : كويس انك جيت لى .. أهلاً وسهلاً .. اتفضل .. أنا عندي إمام كامل بالموضوع ..

الطارق : ماهم قالوا مدرس التاريخ هو اللي يعرف كل حاجة ..

متولى : والله يا أخى - احنا لسه ماتعرفناش -

الطارق : معلش .. أجل التعارف شوية لأنى مستعجل ..

متولى : على كيفك .. المقصود .. أنا لما أجرت البيت ده كنت حاسس بقيمته العظيمة وقلت لشهيبور وعاصى بصراحة انه تحفة فنية ..

الطارق : درستة كويس من ناحية العمارة والتركيب ؟

والأمن ناحية الزخارف والخطوط بس ؟ ع
العموم انت ما بالكش كثير .. قدامك وقت ..
متولى : يا أستاذ أنا من يوم ماجيت وأنا باكتشف كل
يوم فن جديد من فنون البناء .. والخطوط
العربية ..
الطارق : شفت ازاي الديوانى لأول مرة بيمتزج
بالريحاني ؟
متولى : الحقيقة ماخدتش بالى .. لكن شفت عبقرية
الفارسي .. إعجاز !
الطارق : الله ينور عليك .. أهو انا قلبى انفتح لك ..
هكذا تكون الخطوط . مش الجماعة الجداد
بتوع اليومين دول
متولى : حسنى ؟ سيد ابراهيم ؟ محمد ابراهيم ؟
مالهم ؟ دول ممتازين !
الطارق : (يضحك) حسنى يا أستاذ ناقل التُّلُتُ بتاعه
نقل مسطرة م النواوى .. وعلم تلاميذه يحفظوا
كل شغله زى مايكون هو اللى عامله .. بص
على أى جدار فى أى مسجد حتلاقى التأثير
واضح - خصوصا فى الآية الكريمة «إنما يعمر
مساجد الله من آمن بالله واليوم الآخر »
متولى : وإيه رأيك فى شغل سيد ابراهيم فى
الهمايونى ؟
الطارق : الحمد لله ان احنا موش بعيد ! تعال ..

(يزيل لوحة رقيقة من الحائط فتتكشف

لوحة من الخط العربي الهمايوني

البديع)

متولى : لا إله إلا الله ! أمنت بك يارب ! كانت فين دى ؟

الطارق : يعنى انا جاييها معاى ؟

متولى : دا سيد ابراهيم ناقلها نقل مسطرة !

الطارق : ولسه ! جمال الخط العربي اللي بينطق بالحق

فى كتاب الله .. تمازج الخطوط الشرقية

وتناسقها .. زى الفارسي مع الكوفي مثلا

.. والرقعة مع النسخ .. كل ده شغل النواوى ..

متولى : كلامك حلو يا أستاذ وحبيبي فى البيت أكثر ..

الطارق : بس شوف لى وحياتك حكاية الواد موسى ده ..

متولى : أبدأ داحنا كنا بنتكلم فى الرخامة اللي عليها

تاريخ جامع أيو النَّصْر

الطارق : اللي بتتشطر ؟

متولى : لا مؤ اخذة .. تتشطر الرخامة ازاي ؟

الطارق : موش الرخامة ! الأبيات ! أصل زمان لما كان

شاعر يكتب قصيدة حلوة وتعجب الخليفة يقوم

يطلب منه يشطرها يعنى يخلي كل بيت بيتين

متولى : إزاي ؟

الطارق : قلت لى إزاي .. بيجي للبيت الأول فيخلي

الشطر الأول زى ماهو .. ويزود له شطر تانى

جديد من عنده

متولى : من نفس الوزن والقافية ؟
الطارق : طبعاً .. ويبقى للشطر الثانى ويزود له شطر
أول جديد من عنده !
متولى : زى إيه ؟
الطارق : خد البيت المشهور ده :
حورية من جنة الرحمن ..
مثل النسيم سرت على الشيطان
متولى : حتعمل فيه إيه ؟
الطارق : نخليه بيتين كده :
حورية من جنة الرحمن ..
كالعطر تمزجه أيادى الجان
تهفو مع الليل البهيم إذا سرى ..
مثل النسيم سرت على الشيطان
متولى : الله الله ! لاه .. دى القعدة حتجلى .. واد
ياشعبان ! شعبان !
الطارق : ماتسيبه نايم حرام !
متولى : هو لحق ينام ؟ دا ماصلاش العشا !
الطارق : لا .. صلاها ..
متولى : ربنا يظمنك .. لكن معنى التشطير ده إن ممكن
القصيدة اللى طولها عشرين يبقى طولها
أربعين ..
الطارق : ده إذا رضى الشاعر أو الخطاط ..
متولى : وساعات ما بيرضاش ؟

الطارق : ساعات يقول الوحى ماجاش .. يتعلل بسبب
وخلافه لحد الوقت ما يفوت وتيجى مناسبة
تانية ..

متولى : يبقى احنا أسأنا تفسير اللوحة اللى كان
مفروض تتشطر ..

الطارق : المؤرخ يا أستاذ متولى .. يجب ما يعتمدش
على التخمين .. يجب يتيقن ويتثبت لحد ما
يطمنن قلبه للنتيجة اللى وصل لها ..

متولى : وده اللى انا قلته لموسى ..

الطارق : بالعكس يا أستاذ متولى .. دانت شجعتة وقلت
له انت عبقرى وطلعتها فى دماغه .. موش بس
كده ! دانت تصورت ان التاريخ كله مبالغات
ومغالطات موش ممكن تتحل إلا إذا اتهد
البيت !

متولى : صحيح ! أنا تصورت فى لحظة إنه البيت مليون
أسرار ممكن -

الطارق : وده صحيح برضه - البيت مليون أسرار .. بس
الهدم موش هو الوسيلة الوحيدة اللى نعرف
بيها التاريخ .. والحقيقة .. (لحظة صمت
وتوتر) أنا أخرتك النهارده

الطارق : معلش .. شوف بقى ان كان ممكن تصحيح
الخطأ .. وانقاذ مستقبل موسى عيسى ..

متولى : ضرورى .. لازم .. على فين .. بدرى .. يا
أستاذ حضرتك ماقلتيش اسمك إيه ؟

الطارق : باترى اسمى حىكون له أهمية فى الموضوع ده؟

مش لما تيجى منك انت ببقى أحسن ؟ تقول

انا فكرت وتأملت - وده صحيح -واهدتيت إلى

احتمال كذا وكذا .. موش ببقى أحسن ؟

متولى : عندك حق .. مع السلامة .. مع السلامة ..

(يخرج الطارق)

(إظلام)

(عندما يضاء المسرح يكون شهبور

وعاصى يتحادثان مع متولى)

شهبور : أصل حكاية الواد موسى دى .. يعنى (يكج

كحة عنيفة)

عاصى : عمى يقصد انها شغلت الراى العام .. وأنها

أثارت اهتمامه بالبيت ..

متولى : يعنى ممكن ببقى من الآثار ؟

شهبور : ماهو ده الموضوع اللى عايزين سيادتك فيه !

متولى : ازاي .. وبصراحة ..

عاصى : عمى شهبور يحب يطمئنك الأول إن عرقك

محفوظ..

متولى : احنا قلنا نتكلم بصراحة ..

عاصى : بعد الواد موسى ماشكك فى تواريخ البنا ..

وسيادتك برضه أيدته فى القضية والحمد لله

أهو كسبها واتخرج م المدرسة بتفوق ..

متولى : انتو موش عايزين الصراحة ليه ؟ فيه إيه

مخبيته ؟

شهبور : سيادتك دلوقتي بقيت مشهور .. بقيت شاعر

شطائر

عاصي : تشطير يا عصى .. الشطائر دى هى
السندويتشات ..

شهبور : مفهوم يابنى مفهوم .. الغرض .. كلمة الأستاذ
متولى مسموعة .. ولو قال البيت اتبنى يوم كذا
ماحدث حيقول له لا ..

متولى : أولاً أنا ما أقدرش أقول حاجة تاريخياً إلا لو
كنت واثق منها .. وأنا لحد الوقت موش واثق
من تاريخ بنا البيت .. وثانياً ماقلتش انى
شاعر .. أنا قلت انى أعرف واحد شاطر فى
التشطير وهو اللى بيعمل العملية دى

عاصي : بس لازم بيخش لك قرشين برضه يا أستاذ
متولى ..

متولى : هو انتو ياناس مافيش فى مخكم غير الفلوس ..
كلمة والثانية وقرش ؟ (صائحا) دى مصيبة
إيه دى ؟ خلاص - عايزين تبيعوا الدنيا
وتشتروها .. طب موش لاعب ! لا حاكتب عن
البيت .. ولا حافتح بقى خالص ..

شهبور : يبقى فى الحالة دى حنستصدر لك أمر إخلاء
قانونى ..

متولى : والسبب ؟

عاصي : مادفعتش الإيجار !

متولى : نكتة الموسم !أيها الناس ..اسمعوا وعوا ..
رجل أنفق آلاف الجنيهات لإصلاح العقار
يطرد لأنه لم يدفع الإيجار ! يا اخوانا العقد
اللى احنا كاتبينه ينص على خصم الإيجار من
نفقات إصلاح العقار !

شهبور : والإيجار يبلغ أضعاف أضعاف نفقات إصلاح
العقار !

متولى : مين اللى قال كده !

عاص : مستوى السوق يا أستاذ .. انت ناسى ان احنا
سنة ١٩٩٣ ميلادية ! والآلاف اللى انت انفقتها
دى دخل قصاها الشئ الفلانى ..

شهبور : أنا متها لى ان البيت فيه كنز ..

عاصى : نسكن احنا فيه ونستخرج الكنز على
راحتنا ..

متولى : ماشى ! ميعادنا فى الحكمة إن شاء الله ! مع
ألف سلامة !

(يخرجان)

(صائحاً) خلاص ياموسى ؟ موسى يابن

عيسى ؟ سامعنى ؟

موسى : (داخلاً) أيوه يا أستاذ .. خير

متولى : خلصت تبييض ؟

موسى : فاضل صفحتين ..

متولى : ده يعتبر البحث المطلوب منك فى الكلية ..

مفهوم ؟ (يهمس له) مش عايز حد م الكلية
يعرف مصادر معلوماتك ..

موسى : أنا أسف اللي بأسأل السؤال ده لكن يهمنى
والله أعرف ..

متولى : خير ؟

موسى : الراجل بتاع التشطير جاى لك قريب ؟

متولى : شوف ياموسى .. خليك فى دراستك .. واحمد
ربنا .. عايزك أول ما أخرج تعمل الاجتماع
اللى اتفقنا عليه .. وتشرح لهم الوضع .. يعنى
.. الأهمية الأثرية للبيت .. وضرورة المحافظة
عليه .. وادى كل واحد المادة اللي عايزها
وخليهم يصوروها على الزيروكس .. وإن شاء
الله بكرة كل شيء يتحل .. سلامو عليكم
(يخرج)

موسى : (إلى زميليه) على .. فهم .. سامعنى ؟

(يدخلان) أندھوا بقية الطلبة عشان ننفذ
اللى قال عليه الأستاذ متولى ..

(فى ثوان يتجمع ست أو سبع طلبة
حول موسى - بمجرد أن يبدأ الكلام
تسمع أصوات فى الشارع وخطب على
الباب)

موسى : الثروة التاريخية لا تقدر بمال .. واحنا دلوقتى
فى إيدنا ثروة ماكناش نحلم بيها .. ثلاثة مننا

دخلوا الجامعة .. والباقي في معاهد عالية
يعنى إن شاء الله حنكون نخبة من المثقفين في
البلد الصغيرة دي والتلاتة اللي في الجامعة
ربنا وفقهم لقسم التاريخ عشان نصون البلد
وأثارها .. والبيت في رأينا من أثارها المهمة ..
أصوات : افتح الباب أنت وهو ..

عايزين نصيبنا م الكنز ..
البيت بتاعنا كلنا مش بتاع الحرامية ..
(يطرقون الباب طرقةً عنيفاً ويدخلون
بقيادة عطوة)

موسى : إية يا أستاذ عطوة .. خير؟
عطوة : أستاذ ؟ أنا موش أستاذ ..أستدّ نفسك انت
والحرامية ..

موسى : عيب يا عطوة كده .. داحنا ولاد حنة وقرايب ..
عطوة : ماليش قرايب حرامية ..
موسى : حرامية ليه ؟ سرقنا منك حاجة ؟
عطوة : كنز النواوى .. معروف .. معروف والا لا
يارجاله ؟ (همهمة : معروف - معروف)
عايزين نصيبنا بالعدل والحق ..

موسى : تحبوا تفتشوا البيت ؟
عطوة : هأع .. قديمة .. ما انتو خبيتوه طبعاً !
موسى : نسيب لكو البيت ؟
عطوة : (يفاجأ وتعقد الدهشة لسانه) تسيبوا ..

تسيبوا .. تسيبوا لنا البيت .. ازاي ؟ الأستاذ
متولى قال لي إن إشاعة الكنز دى من تدبير
شهبور وعاصى .. مش هاین عليهم البيت بيقى
من الآثار ويزوره السياح وتزدهر المنطقة ..
موش هاین عليهم القروش اللى بياخدوها م
الإيجار .. عايزين يهدوا البيت ويبنوا عمارة
استثمارية .. انتو عارفين يوم ما بيقى ده م
الآثار

عطوة : احنا عايزين الكنز ..

موسى : ماشى .. اتفضلوا .. احنا حنتوكل .. يالله
ياعلى .. يالله يافهيم ..

عطوة : يالله على فين ؟ والذهب اللى فى جيوبكم ؟

موسى : عيب كده يعطوة دى عشرة عمر !

عطوة : مافيش عمر ولا نص عمر .. اقلع انت وهو ..

(يشتبكون بالأيدي - والكراس - وتطفأ

الانوار تدريجياً - وتهبط الستار)

(إظلام)

(عندما يعود الضوء نرى متولى والطارق

يتجولان فى المسرح)

الطارق : دا اللى انا كنت خايف منه ..

متولى : دى مجرد فورة .. شعله ولعها شهبور وانطفت ..

الطارق : تفتكر كده ؟ تفتكر انها انطفت ؟

متولى : أنا كلمت معظمهم النهارده الصبح ونادمين

على اللى حصل ..

الطارق : لكن طول ما اللغز موجود .. والتحول الى
حصل غير مفهوم .. حتحصل فورة ثانية ..
وثالثة .. وتشعل .. حتى من غير شهبور ..
متولى : قصدك إيه بالكلام ده يا أستاذ ..
الطارق : قصدى إنه ماعادتش فيه مكان للأثار وريحة
التاريخ وجمال الماضى وأسرار حياة الناس
فى جيل أول القرن اللى انت نشرتها .. واللى
ولا دك بيذاكروها من مصادرها الأصلية ..
عطوة مالوش فى العلم .. ولا عيال الحقة
الجدعان .. يا أستاذ متولى البيت ده ..
بخطوطه العربية وزخارفه الإسلامية .. أصبح
شرح فى الزمن .. البيت لازم ينهد عشان
الزمن يتعدل ..
متولى : أرجوك ماتقولش كده يا أستاذ .. انت بتزعلى
خالص ..
الطارق : اللى منه لايد عنه ! البيوت لها أعمار زى
أصحابها .. وابقى تعالى اتفرج على الجيش
اللى حيهجم على الانقاض يدور على الكنز ..
متولى : ع العموم مش حيقدرؤا يهدوه .. عليه سحر ..
الحمد لله ان اصحابه مانسيوهوش ..
الطارق : كان عليه سحر لحد الوقت يا أستاذ متولى ..
وسحره كان حب اللى بنوه وعاشوا فيه .. لكن
دلوقتى خلاص .. القرن بيقتل .. وزمان كامل
بيقتل ..

متولى : قصدك البيت ممكن يتهد دلوقتى ؟
الطارق : لولسته بايدك مش بجاروف .. حينهار زى
الرماد !

متولى : دانا عشت فيه وأصبح لى قوة عليه ..
الطارق : مش وانت عايش يا متولى .. انت ما اتجوزتش
وما خلفتش فيه .. ماعطهوش حياة ..

متولى : انت مين يا أستاذ .. قول بقى أن الآوان
الطارق : أنا النواوى الكبير يا متولى .. شفت نفسى
بابقى شخصين وأربعة واتناشر .. والبيت
بيبقى ..

متولى : النواوى ؟
الطارق : وشفت البيت وهو بيصمد لحرب ورا حرب ورا
حرب .. واللى حواليه بيع .. لأن الناس حبته ..

متولى : وانت يا نواوى ؟
الطارق : فرد .. الناس ما بتحبوش .. وعشان كده لازم
يقع !

(إفلام)

تحت التشطيب
مسرحية من فصل واحد

المنظر عمارة تحت الانشاء - منظرها من الخارج
يؤمن بأنها غير مكتملة . سواء بالنسبة للجدران أم
الشبابيك والأبواب . ويمكن أن نفترض أنها غير
مكتملة أيضاً بالنسبة للمرافق الأساسية - الكهرباء
والمياه مثلاً . المسرح يمثل الدور الأرضي الذي
يصعد منه سلم من الخرسانة الخالصة إلى الدور
الثاني والثالث ودائماً نسمع أصواتاً من فوق تدل
على أن الموهوبين هناك لا يحجبهم شيء، عن
الدور الأرضي . ونحن نراهم وهم صاعدون أو
هابطون . معظمهم يلبسون لبس عمال البناء من
أهل الصعيد والبوايين وسائس الجرافات .
وسائقى الشاكسى والكارو . المنطقة نصف ريفية
على حدود العاصمة الكبرى . الطريق العام واضح
ويستطيع المتفرجون في الصالة أن يروه من خلال
الأبواب غير الموهوبة في العمارة .

عندما تفتح الستار تكون الإضاءة نهائية والجو
هادئ ، جداً ما يؤمن بأنه الفجر مثلاً أو السادسة
صباحاً . يدخل اثنان من رجال الشرطة ويتهايسان
ثم يشيران إلى المنزل ثم يصل ضابط برتبة صغيرة
- ويتحدث معهما)

الضابط : انتو ركتنوا بعيد ؟
الشرطى ١ : يافندم ورا البيت لازم ..
الضابط : طيب خبطوا بقى واللى يفتح اقروا له الأمر ..
يالله يا حسن ..
الشرطى ٢ : البيت مالوش بيبان يافندم .. كله مفتوح على
بعضه .. نخش خلاص ..
الضابط : لا أرجوك .. بيوظوا لى القضية ..
الشرطى ١ : نخبط على اللوح ده - لا مؤاخذه - يافندم ؟
الضابط : خبطوا ..
(يقرع الشرطيان الباب الخشبى)
أم عيشة : (من الداخل) مين اللي بيخبط ؟
الشرطى ١ : أنا شرطى قسم امبابة .. ومعانا أمر بإخلاء
المنزل بالقوة الجبرية ..
(صمت)
الضابط : خبط تانى ..
الشرطى ٢ : يافندم نخش أحسن .. دا مش باب دا لا
مؤاخذه لوح ..
مصباح : (خارجا) صباح الخير يارجاله .. فيه إيه
كفى الله الشر ؟
الضابط : انت ماسمعتش ؟ أمر بإخلاء المنزل بالقوة
الجبرية !
مصباح : ليه لا سمح الله ؟ هو احنا كنا رفضنا نخرج
بالسياسة ؟

إذا كان صاحب املك عايزنا نخرج نخرج ..
ولا إنش يتعملنا محضر فى البوليس يسوا
سمعنا .. داحنا حراس برضه ياسعادة البية
المأمور .. يعنى ميرى تقريبا .. وسمعنا
ونزاهتنا أهم حاجة .. والا أيه يارجاله ؟
(إلى الشرطى ١)

البيه اسمه إيه ؟

الشرطى ١ : اسمى عبد المجيد .. حتنفذ والا لا ؟

مصباح : مانا قلت لسيادة المأمور ..

الشرطى ٢ : ينفع ده ياباشا ؟

الضابط : ورينى الأمر .. (يتفحصه) موش عارف ..
متهيا لى مافيش مانع .. مادام حيخرجوا يبقى
الهدف اتحقق .. ومعنى كده تلغى محضر
الإخلاء بالقوة الجبرية ونقول ان السكان يعنى
.. إن السكان -

مصباح : (ضاحكا) سكان إيه يابيه ؟ داحنا حراس
العمارة .. طول العمارة ماهى تحت الإنشاء أو
تحت التشطيب لازم لها ناس تحرسها من لا
مؤاخذه الايديين اللى كترت قوى اليومين دول

الضابط : القصد ! أهو المهم نصل إلى صلح ونوفر
الجهد ..

مصباح : وفى الحالة دى تكتب كلمة واحدة .. بما معناه

انك لم تجد سكان فى العمارة .. بما معناه إن
السكان أخلو العمارة من ذوات نفسيهم ..
وكده نوفر على حضرتك فتح الحاضر وقفلها ..
الضابط : وانتو تصونوا سمعتكم ! والله حاجة تفتح
النفس ..

الشرطى ١ : لو كل الناس كده !

الشرطى ٢ : الا لازم يعاكسوا ويناقروا ويحايروا
ويديروا ..

الضابط : (يكتب على المحضر) لم نجد أحداً فى
العمارة .. بس يالله وحياتكو شهلوا عشان
نمشى .. لموا كراكيكم بسرعة ويالله ..

مصباح : ياراجل اصطبج واشرب الشاى وروق ! يام
عيشه .. شاى لوسمحت للرجاله ..

(يدخل عبده وهو محام شاب - يقيم فى
الدور العلوى)

عبده : مين دول ياعم مصباح ؟

مصباح : صباح الخير يا ميطر .. داعبده البرديسى
المحامى ياحضرة الضابط ..

الضابط : أهلاً وسهلاً

عبده : جايين يعملوا ايه من بدرى هنا ؟

مصباح : لا ولا حاجة .. دول ماشيين على طول ..

عبده : ولا ماشيين ولا حاجة ! هم فاكرين انهم لسه
بيحكمونا بالحديد والنار ؟ زوار الفجر

سيادتهم ؟ حد ييجى الساعة دى يشوف
ناس؟

الضابط : يا أستاذ عبده ماتفورش دمك .. الحاج
مصباح اقترح الصلح واحنا رأينا دائما ان
الصلح خير !

عبده : حق يانا س بطلواده واسمعوا ده ! (يضرِب
كفا بكف) يعنى كات فيه قضية واتحلت
ووصلتوا للصلح فيها وانا فى سابغ نومة ازاي
الكلام ده يحصل ياعمى ؟ قضية ايه قول لى ؟
الضابط : إخلاء .. قضية اخلاء العمارة تحت الانشاء ..
عبده : وعمى مصباح وافق ؟

الضابط : ياميتتر دا حكم محكمة .. مالوش يوافق
والايخالف .. سيادتك متحمس زيادة عن
اللزوم ؟

عبده : أنا متحمس ! ؟ ياخلق اسمعوا وعوا ! ضباط
وعساكر عايزين يطردونا بالقوة من بيتنا
ويقول لى متحمس ! يا أستاذ ايام الدكتاتورية
راحت .. شغل السلطوية ده انتهى ! فيه قانون
النهاردة .. اللي عايز يعمل حاجة يعملها
بالقانون .. اللي عايز يبطش يبطش بالقانون
على رأى اسمه ايه .. الله يرحمه !

الضابط : يا أستاذ عبده احنا معانا حكم محكمة ..
(يكون بعض الأهالى قد تجمعوا)

عبيده : حكم محكمة يمكن لكن لم يُبلَّغ به ؟
الضابط : يا فندم اتفضل شوف !
عبيده : حكم غيابي .. وما بُلِّغناش بيه .. انتو فى أنهى
بلد ؟ انتوفين .. واحنا فين ؟ طب والله لارفع
قضية على عبد السلام أفندى بتاعكو تجيبه
الارض ! لقد انتهى عهد الاستغلال يا حضرة
الضابط .. عهد الرأسمالية المستغلة .. عهد
الاقطاع ورأس المال .. (تاخذہ الجلالة) بل
وعهد تحالف رأس المال مع الاستعمار ..
مصباح : عبده يابنى سلامتك .. هاتى شويه ميه يام
عيشة ..
(تدخل أم عيشة بقلة وكوب)
(يعطيه القلة) اتفضل ..
الضابط : يا أستاذ عبده أنا عبد المأمور .. عندى أمر
تنفيذ حكم .. ولازم أنفذه ..
مصباح : ياسيدى خلاص .. اتحلت ..
عبيده : ايه هو اللي اتحل ..
مصباح : حنخرج بالسياسة .. يالله يام عيشة .. لى
الركايب وحطيتهم فى الحوش .. (يضحك)
أما أنا فما عنديش كراكيب .. ماشى بطولى !
الضابط : أنا أقدر لك همتك وتعاونك يا حاج مصباح ..
عبيده : هو ده الحل ؟
الضابط : يا أستاذ عبده هدى نفسك ..

عبيده : يا أستاذ أنا أهدى منك .. وأنا لولا الملامة كنت
ضحكت ع اللي بيحصل ! أنا ما عرفش مين
القاضي اللي أصدر الحكم ده .. وإيه خطوات
تنفيذه اللي فشلت واللى وصلت بينا إلى
الموقف ده .. كل ده حياخذ سكتة القانونية ..
وانت زى ما بتقول عبد المأمور .. لكن أنا
الموضوع يخصنى .. أنا مشرف على العمارة ..
وده توكيل رسمى .. وساكن فى الدور الثالث
.. وفرحى كمان النهارده يا أستاذ .. عارف
يعنى إيه فرح ؟ يعنى جواز .. يعنى دخلة ..

الضابط : دى مسائل تتحل يا أستاذ عبده برضه

مصباح : نأجله ياسيدى ..

عبيده : نأجله يوم الفرح الصبح ياعم مصباح ؟ ونقول
ان السبب إن العريس انطرد من شقته ؟ وليه ؟
لأن صاحب الملك مزاجه كده ؟ لأنه قرر كده
وطلع حكم محكمة بكده ؟ دانا كنت أموت قبل
ما ينول غرضه ..

الضابط : أرجوك يا أستاذ ماتوصلهاش لكده ..

مصباح : اعقل يا عبده يابنى ..

عبيده : أهو ده عين العقل ! زى مايقولوا الخواجات -
فوق جنتى !

الضابط : (لأول مرة يحتد) يا أستاذ عبده أنا كنت
محترمك إلى الآن باعتبارك رجل قانون .. لكن

لما تخالف القانون يبقى لازم أخلى السلطة
التنفيذية تتصرف ..

عبده : يعنى حتقبضوا على وترموني فى السجن ؟
الضابط : حضرتك عندك حصانة وده مش ممكن إلا إذا
شلناها ..

عبده : (يتنبه للجمع الغفير الذى احتشد
حولهم) يا قوة الله ! بيعملوا إيه دول كلهم ؟
إيه يا جدع أنت وهو ؟ مالكوش أشغال ؟ إيه
ياست أنتي ؟ إيه اللي موقفك هنا .. مش تودى
العيال المدرسة ؟

(تدخل تفيدة وهى تصرخ)
تفيدة : (عويل) يالهييه ! يالهييه! حيقبضوا على عبده
جوزى ! الحقونا .. الحقونا ..

عبده : إيه ياتفيدة مالك كفى الله الشر ؟
تفيدة : (صراخ وعويل) عملت إيه ياعبده قول ..
قوللى ياخويا دانا أجيبلك أكبر محامى فى
البلد !

مصباح : (صارخاً) بس ياتفيدة بلاش فضايح ! كده
لبتي علينا الخلق !

تفيدة : الواد محروس ابن زينهم جا قاللى أنهم
حياخدوا جوزك فى اليوكس ..

مصباح : يامجنونة ماحدش حياخده ولا حاجة ..
عبده : ماتخافيش ياتفيدة حانتجوز الليلة حسب
الاتفاق ..

تفيدة : (تهذا قليلاً) نتجوز وانت فى أيدىك الحديد؟

ياوكستك ياتفيدة .. ياخيبتك القوية .. ياوقعتك
السودة .. يافرحة الأعادى فيكى .. أدى اللى
خدت من عمارة عبد السلام وسكان عمارة عبد
السلام .. نازلة طالعة ياخضرة الطابط أجيب
فى حاجات وأودى فى حاجات لما رجلى أتھروا
.. طالعة على الأسمنت ونازلة على الأسمنت
.. وكنت قال إيه حاجوز ع الأسمنت !

عبيده : خلاص ياتفيدة .. أنا وعدتك !

الضابط : حيث كده أنا حاعمل محضر تانى .. وياريت
تبقى تشرفنا فى قسم أميابة عشان تمضيه ..
ونمشى فى الاجراءات القانونية ..

عبيده : وعمى مصباح مش خارج ..

الضابط : المحضر بتاع عمك اتلغى وخلاص .. خللى
الصبحية تفوت على خير ..

عبيده : (تخطر له فكرة) وان اعتبرنا أنه اتلغى
والمشكلة بقت مشكلتى لوحدى .. ممكن تسمح
له يحضر فرجى ..

الضابط : حضور فرج مافيهوش حاجة .. طبعاً ..
قصدى ..

عبيده : وانت كمان ؟

الضابط : بصفة شخصية طبعاً ممكن ! دا يسرنى
كمان ..

عبيده : وتدعى لنا عبد السلام أفندى صاحب العمارة
.. أهو يشرب الشرباط ويتفرج ع التحطيط ..
الضابط : دى ماقدرش عليها ..
عبيده : حاول معاه بس .. يمكن المفاجأة تعجبه !
الضابط : مفاجأة ؟

(إظلام سريع - وعندما يعود النور يكون
الجو ليلا والكلوبات والأعلام والزينة
تؤكد أن هذه ليلة الزفة)

المغنى : سبع سواقى بتنعى .. اللى راح مايعود
تدور على بطن فاضيه .. الجودة م الموجود
المية كانت غـذانا وقوتنا وحياتنا
مهما علت شمس يونيه الأرض كلها الدود
المغنية : من بيتى آخر الصعيد الأرض طردتنى
الطين نشف جوه بطن التربة وجرحنى
قال خنتم العهد ليه .. ليه يارجال الجود
خنقتوا نهر الحياه .. قولوا ليه خنقتونى !

المغنى : من بيتى آخر الصعيد قادم أقول يامصر !
لا عارف أسكن فى بيت ولا عارف اتستـر
كل الأماكن مساكن ربنا قـدر
مفاتيحها فى يد كافر عمره ماعمر

المغنية : صاحبها كافر بيرمى فى الأساس .. دورين
ويخلى هيكل عمارته من سنة لعشرين

لحد ما السعر يعلى والتجارة فن
لكن لاحد يسكن ولاحد يعرف فين !
(الضابط داخلاً مع عبد السلام المقاتل)
عبد السلام : بيتكلموا على ايه دول ؟
الضابط : دى غنوة صعيدى ؟
عبد السلام : لا لا لا .. اسمع كويس .. دول بينبَطُوا على
العمارة ..
الضابط : اسمع بس يا أخى ..
المغنى : عديت بيوته لقيتهم خمسميت بُيان
مافيهمش مبنى اكتمل أو حط له عنوان
وفى بعضهم شفت ناس لكن عذابهم طال
لا هُم حراس عمارة .. ولا هُم م السكان !
عبد السلام : سامع .. سامع !
الضابط : يا سيدى انت حتاخذ فى بالك .. صعايده
وبهيصوا ..
عبد السلام : والله مانا ساكت لهم .. يعنى خَلَى بالك .. أنا
عشان خاطرك بس جيت الفرحة .. عشان كمان
أظهر حسن النية .. لكن والله ..
الضابط : شوف يا أخ عبد السلام .. احنا لو اقتضى
الامر نخرجهم كلهم فى حديد ونرميهم ورا
الشمس .. (يضحك ويهمس) انت فاكر ان
انا اتهزيت من كلام الواد عبده ده ؟
عبد السلام : هو لبخ كثير لازم !

الضابط : قال كل اللي طلع من ذمته .. يعنى من
الرأسمالية للاستعمار ..

عبد السلام : ياساتر يارب .. كل ده عشان عايز أغير
الحراس ؟ هوده مش ملكى ؟ ما أقدرش أعين
الحرس اللي انا عايزه فى أملاكى ؟

الضابط : فيه ناس ما بتقدرش تفهم القانون ..
وخصوصاً - عارف خصوصاً مين ؟

عبد السلام : قصدك المحامين .. لا .. دول فاهمينه كويس
قوى .. وهم عشان فاهمينه بيبوظوه .. الله !
هو الناس سككت ليه ؟

(يلاحظ أن مظاهر الفرخ تراجعت وساد
السكون)

الضابط : انت يا أخ .. يا اسمك ايه ..

فـالـح : (فى لهجة المسطول) خير يافندم تحت أمرك
الضابط : هو الناس راحت فين ؟

فـالـح : (بلهجة السكران) الله أعلم يافندم .. يمكن
البوفيه والا حاجة .. أصل لا مؤاخذه الميتر
مجهز الدور التالت كله لحسابه يعنى عامل فيه
البوفيه برضك !

عبد السلام : سامع ! (فى غيظ مفاجيء) لحسابه !
سمعت كلمة لحسابه ؟

فـالـح : لا مؤاخذه ياغب سلام بيه .. الليلة ليه فرحه ..
وهو أخذ اذن من الضابط انه يعمل فى ميعاده

.. قال مدام فرح بقى ببقى خليه فرح (يشير

إشارات معناها تدخين الحشيش)

والآ أنت مش معايا ؟ فهم تلاقىهم اخدين لهم

شوية كده عشان المسائل لزوم الانبساط ..

عبد السلام : وانت خدت نصيبك ضرورى !

فـالـح : عبده بك كريم قوى يا باشا .. آمال ايه ! طب دا

مرة عمل لنا فرح هنا قبل عبد السلام باشا ما

يشترى العمارة .. من زمان واصل ..

(صمت)

عبد السلام : (يشخط) قول .. اتكلم ..

فـالـح : يا بيه انا مدايقكو فى حاجة ؟ أنا زعلت عب

السلام باشا ؟

الضابط : كمل أرجوك يا .. اسمك ايه قلت ؟

فـالـح : فالح ! هأأو ! وانا عمري مافلحت فى حاجة ..

جريت عشرميت شغلة .. من يوم ماسكنت فى

العمارة اللى ع الناصية دى .. يا خرابى يا ولاد

.. ما فى شغلانة إلا جربتھا ..

الضابط : العمارة اللى الناحية دى اللى تحت التشطيب ؟

فـالـح : هأأو ! دى شطبت على جيوبى .. مخلف

فيها ١٢ عيل وكل عيل لازم توكله وتجيّب له لا

مؤاخذه جزمة .. أو جزمتمين سيادتكم .. والجزم

غالية والشغل فلوسه قليلة .. ابقى أقول ربنا

ما ياخذش منهم كام عيل ويريجنى ؟ لكن أبداً

الإتناشر عاشوا .. تصوّر يابيه المرضات
بتوع المستوصف كانوا يدوهم حقن التطعين
هنا .. تطعين السلاسى ! وكل شوية عربيات
بتاعة المحافظة .. بصراحة المحافظ راجل
سكره ..

عبد السلام : انت كنت بتكلم عن فرح عملتوه زمان ..

فـالـح : يوه .. سيادتك فاكر ؟

الضابط : (يشخط فيه) انت ياراجل يامسطول ! ؟
ما تكلم عدل ..

فـالـح : (مذعوراً) مسطول ؟ مين اللى مسطول
يابيه؟ حد الله بينى وبين السطل .. دانا راجل
موزون وعادل .. وحياة ابنى زردق اللى
مافى أغلى منها .. عمري ماجالى مرض !
ليه بقى ؟ (حركات مسطول) عشان
الاعتدال ! يعنى بعد ما خلقت الواد ده قلت
كفاية ! اعتدل يا فالح ونظم النسل .. وأهو ربنا
طارح فيه البركة ويبسرح مع الغوازي فى البلد
.. أصل بلدنا قريبة .. ورا شريط القطر عدل ..
تعدى سيادتك المزلقان تبقى وسط السوق ..

عبد السلام : والفرح ؟

فـالـح : ماهو ده الفرح .. هما بس أخدين اجازة خمسة
(يضحك) ها أأ و ! ياريتنى أرجع شباب
يابيه ! كنت أمسك لك عمارة من بتوع منشية
البكرى .. أنا سامع انهم عمارات تمام ..

الضابط : تعا نطلع لهم نكلم عبده ونصفي الموضوع !

فـالـح : لا لا لا لا لا لا ! اوعوا تطلعوا لا الصعايدة

يضربوكو بالنبابيت ..

الضابط : يالله يا أستاذ عبد السلام ..

فـالـح : طب والله العظيم ضربة النبوت ما لها تاني !

واحد خد له ضربة داك النهار وقع ماقامش ..

أستغفر الله العظيم - حتى مالحقش يقول

الشهادتين .

عبد السلام : (مرعوباً) قريب من هنا ؟

فـالـح : جوه العماره يابيه ! الحاج مصباح جدع ..

حسّ بحدّ بيشمشم على حديد التسليح قام

واخده نبوت .. حاكم هو موته وهلاكه حديد

التسليح .. زى مايكون اسرق منه قبل كده

والا زى مايكون -

الضابط : (صارخاً) انت بالبع رديو يا جدع انت ؟ انت

عرف انت بتقول ايه ؟ (صارخاً) انت عارف

المسؤولية الجنائية المترتبة على كلامك ده ؟

تعرف انه بمثابه بلاغ وسمى عن جريمة قتل ؟

فـالـح : إيه ياباشا ؟ إيه باشا الكلام الكبيرده ؟ احنا

موش قد ده كله !

عبد السلام : انت بتهزر طبعاً يا فالح !

فـالـح : باهزر ؟ .. لا وحياة ابني زريق ! أصل النبوت

يابابا ضربه فن ومش أى حد يمسه ! والأ

حلاوة الحرامى وهو نازل ساكت زى قالب
الطوب ! ماقالش أى .. مافتحش عينيه ..
الضابط : يالله يا عيد السلام بيه بينا ..
عبد السلام : أنا باقول نستنى لما ينزلو .. مش معقول
حيطولوا يعنى ..
الضابط : اوعى تكون خايف .. أنا صحيح لابس مدنى
لكن معاى مسدسى الميرى ! (يخرج) أهه !
فـالـح : الله ! فرفر من بتوع زمان ! لكن بيصحوا منه !
الضابط : مين اللي بيصحى ؟
فـالـح : الواد زُرْبَقَة ضربوه خمس رصاصات وعاش ..
أنا قلت لهم .. إن كنتو عُلبتو فيه .. ادوله نبوت
.. نبوت واحد يا عبد السلام باشا ..
الضابط : انت مش جاى ؟
عبد السلام : لا أنا .. اتفضل حضرتك ..
الضابط : أسبقك والا مش ناوى ؟
فـالـح : أجى معاك يا عبد سلام باشا .. رقبتي ليك .
(هامساً) بس لوتشوف لى موضوع منشية
البكرى ..
عبد السلام : أتكّل علي الله انت يا فـالـح .. واسمع .. عدى
علىّ فى المكتب بعد صلاة الجمعة ..
فـالـح : والنبي صحيح ؟ يامننت كريم يارب !
(يخرج ويختفى)
عبد السلام : تفتكرانه مسطول والا فايق ؟

الضابط : فى الغالب مسطول .. لكن الجماعة دول
شياطين .. صعب الواحد يعرف الجد من
الهزار معاهم ..

عبد السلام : أنا ع العموم جيت عشان خاطرك بس ويهمنى
أنتك تعرف قد ايه أنا مقدر شغلك .. وجهك
معاً

(يلمح إلى دفع المال)

الضابط : عيب يا عبد السلام باشا الكلام ده .. هو انا
حاصل زى الناس التانيين ؟ أنا حاطرد لك
الجماعة يعنى حاطردهم .. ولو العملية
احتاجت نيايت ندولهم بالنبايت .. (صمت
وتوتر) وانت عارف انى زى ما قلت لك كاتب
كتابى بقى لى سنة .. ودى مسألة متروكة لك
تماماً .. يعنى عاملنى زى ما بتعامل أى زبون ..
عبد السلام : عيب يا محمود بك .. انت زى ابنى بالضبط ..
وأنا دايمًا اساعد الشبان اللى زيك واللى
أصغر منك .. اوعى تتصور أنها حكاية فلوس!
الفلوس بتروح وبتيجى .. ويا ما عمارة الواحد
يكلّفها ثقلها وتخيب ..

الضابط : مش فاهم ..

عبد السلام : (يضحك) ده تعبير الصنعة ! يعنى
ماتجيبش فلوس .. تصدق بالله ! ؟

الضابط : أمنت بالله ..

عبد السلام : أهونا مسكّن عمارات فى الحلمية والدرب
الأحمر .. عمارات كاملة بايجار شقة فى
المهندسين .. يعنى اعمل ايه فى العمارات دى ؟
أهدها ؟ مش معقول ! دول ساكنينها ناس
وبينا ود ومصالح .. وبيننا لا مؤاخذه ياسى
محمود عشرة .. فيه ناس فى عمارة الدرب
الأحمر ساكنين من أربعين سنة ! النهارده
باتكسف أخذ الأيجار .. يعنى لا مؤاخذه أجرة
تاكسى !

الضابط : أنت عايزهم يخرجوا امتى ؟
عبد السلام : بينى وبينك هى مش مسألة يخرجوا ويدخلوا ..
أنا عايز أشيل من مخ الحراس دول انهم
ساكنين فى عماراتى .. وحاسكّن معظم
العمارات دى بكره أو بعده .. بالبيع أو
بالتقسيط أو بالايجار مخصوص عشان أبعد
الجماعة دول عن أملاكى ..

الضابط : أملاكك سمعتها فل ياباشا ..
عبد السلام : طالما الجماعة دول فيها .. مش حتفضل لها أي
سمعة .. وكل اللى بنيتة حينهد ..

(فجأة تسمع الموسيقى ويهبط الرجال
بالنبايت)

شايف ؟ سامع ؟ أنا ماشى يامحمود !

الضابط : استنى ياباشا لحظة .. نكلمه كلمتين .. يانتفق
يانختلف ..

عبد السلام : العملية واضحة يا محمود يا بنى .. دول عايزين
يفرضوا نفسهم علينا وعلى القانون وعلى
البلد..

(يبدأ مشهد التحطيط وتعزف الموسيقى
أغنية جديدة بينما ينزل الرجال قطع
أثاث من فوق ويرصونها على المسرح -
الدور الأرضى)

المغنية : يامنفلوطى

المجموعة : يارمان ..

صوت : يا بوالبدع

(موسيقى)

المغنية : ملو البقوطى

مجموعة : يارمان

صوت : ويأجدع!

(موسيقى)

المغنية : أحمر لسعنى

مجموعة : يارمان ..

صوت : وحلمت به

المغنية : شارى وباعنى

مجموعة : يارمان ..

صوت : وفرحت به (موسيقى)

المغنية : أحمر سكرنى
 مجموعة : يارمان .. (موسيقى)
 صوت : لكن حلال
 المغنية : بياض خامرنى
 مجموعة : يارمان
 صوت : زى الزلال
 (موسيقى)
 المغنية : فى كل حبة
 مجموعة : يارمان
 صوت : من غير كلام
 (موسيقى)
 المغنية : نظرة ومحبة
 مجموعة : يارمان ..
 صوت : على الدوام
 (التحطيط مستمر ولكنه يخرج من
 المسرح وتسمع عبده يقترب من عبده
 السلام والضابط مبتسماً سعيداً)
 عبده : مساء الخير وأهلاً بالاخوان .. دول الصعايدة
 ما انتو عارفينهم .. لازم يغنوا أغانيهم من باب
 الحنين للوطن !
 عبدالسلام : مبروك يابنى الجواز .. محمود بك كان عايز
 يكلمك ..
 عبده : تحت أمركم !

الضابط : هي كلمة واحدة يا أستاذ عبده عشان نروح ..
عبده : ياخبر .. دا كان عمى مصباح يزعل خالص ..
ومرات عمى .. أم عيشة ومحروس ابن زين ..
ومش عايز أقول والعروسة .. لكن والله تزعل
ياما ..

عبد السلام : احنا موش جينا حسب طلبك أهه ؟
عبده : أستاذ عبد السلام أرجوك ارفع الكلفة .. حاكم
انا الليلة عامل زى روميو ..

عبد السلام : مفهوم مفهوم ..
الضابط : هيه ؟ حَتَّلو المكان الليلة ان شاء الله ؟
عبده : حضرتك شايف ايه ؟
الضابط : (محاولاً أن يكون دبلوماسياً) شاف انك
ماتزعلش عمك عبد السلام .. وهو بقى .. كله
نظر .. يعنى عنده عمارات كتير وقدر يسكنك
فى عمارة منهم .. والله لو تعرفه يا أستاذ
عبده -

عبده : (مقاطعاً) بلاش أيمان وحياتك ..
عبد السلام : محمود بك كلامه مظلوط يا عبده يابنى ..
عبده : تشوف لى شقة فى عماره هنا والاهنا ؟
عبد السلام : ميه فى الميه !
عبده : وعيلتى الكبيرة دى الى حيناموا على الرصيف
الليلة دى ؟
الضابط : والله دى مسألة - (يتجهم)

عبد السلام : ع الرصيف ازاي ؟
عبيده : أهم .. كلهم .. أنا ومراتي هنا .. فى السرير ده ..
ومصباح وام عيشة هنا .. ع الأرض ..
ومحروس وزين أمه هنا .. وعيشة لوحدها
عشان .. يعنى .. كلنا كده فى الهواء الطلق
.. وأهو الليل قصير .. داحنا الساعة عشرة
دلوقتى ولسة غروب الشمس يا جماله ..
(ينظر إلى السماء) ضلّمت شوية !

عبد السلام : انتو ماكنتوش عاملين حسابكم ؟ ؟
عبيده : حساب ايه ياباشا ؟ عمى مصباح وصل م
الصعيد الجوانى ع العمارة دى .. اتربى فيها
من جديد .. صاحبها القديم كان راجل سكرة
.. عينه حارس بأجر كويس وسمح له بيعت
يجيب مراته .. بس .. بقى ده مكانهم الوحيد ..
واللى مالهومش غيره فى مصر ..
الضابط : أيوه .. مصباح راجل كبير .. وام عيشة
عجرت .. لكن انتو ؟

عبيده : (يضحك) أنا اتولدت هنا يا حضرة الضابط ..
أنا ماجيتش من بلد لبلد لأ .. وعيت ع الدنيا
لقيت نفسى فى عمارة تحت التشطيب .. من
غير عنوان .. وحكايتى زى حكاية نص أهل
مصر تستاهل تتحكى .. ولد عفريت شاطر
صمم يكمل تعليمه رغم الظروف المستحيلة ..

وانه ينجح .. خللى بالك معاى يا حضرة
 الطالب .. أنا باتكلم ع النجاح فى الدنيا مش
 النجاح فى الكلية ! فاكتر مادة الجنائى اللى
 كان بيدرسها لنا المرحوم سعد عبد الشافى ؟
 لازم هو اللى درسها لكم برضه فى الشرطة ؟
 فاكتر اما كان يفرق بين النجاح بمعنى تحقيق
 الهدف والنجاح بمعنى إدراك طريق الهدف ؟
 أنا من اللحظة دى عرفت إن النجاح بالمعنى
 الأول صعب .. قلت ننجح بالمعنى الثانى .. وقد
 كان .. طريق هدفى هو اثبات وجودى فى
 مجال معين .. وهو مجال الاسكان ..
 عبد السلام : قصدك انك انتصرت على ؟ طب والحكم اللى
 صدر واللى وجب تنفيذه ؟
 عبده : الحقيقة لحد الحكم ده ماصدر .. ماكنتش
 ناوى أخش معارك .. القضايا دى .. زى
 محاضرتك عارف صعبة .. وعايظه استشارات
 وسفر ومصاريف ..
 الضابط : ياخوانا احنا بنتصالح دلوقتى .. مش
 بنتصارع ! (يضحك)
 عبده : الصراع أبعد مايكون عن ذهنى .. كل مافى
 الأمر ان الناس اللى انت شايفهم دول -
 وغيرهم من اللى اتولدوا فى العمارات الناقصة
 .. عشان يعيشوا حياة ناقصة .. لاهم فى

الريف ولا هم فى الحضر .. الناس دول
أصبحوا قضيتى .. فى أحسن الأحوال لما
تكمل العمارة حيقوا بوابين ! (يمثل) ياله من
مستقبل زاهر أيها السادة المستشارين ! إن
أقصى ما يطمحون إليه هو أن يستمروا فى
حراسة العمارة - وربما اكتسبوا وضعاً قانونياً
سليماً عند ها فأصبح لهم عنوان !

الضابط : وبعدين يا أستاذ عبده احنا اتأخرنا ..
عبده : ولا اتأخرنا ولا حاجة .. انا بعد ماقرت الحكم
النهارده الصبح .. كتمت غيظى فى نفسى ..
ودرس موقفنا كويس .. ومافيش ساعتين كنت
مخلص كل حاجة .. جمعت جميع الوثائق
والأوراق اللازمة واللى انا عارف هى فى
بصفتى مشرف ع العمارة .. يعنى عقود
إيجار الأرض وبيعها وتقسيمها وتصريح البناء
واستئجار عمى مصباح لحراستها .. واقامته
هو فيها بصفة دائمة ودون تغيير فى حالتها
أكثر من ١٥ سنة !

عبد السلام : (صارخاً) وضع اليد !
عبده : تمام ! برافو عليك يا عمى .. العمارة والأرض
بقت بتاعة عمى مصباح بوضع اليد .. وطبعاً
هو حيرضيك عشان
عبد السلام : (هياج شديد) سامع يا محمود ؟ سامع سى

عبده أفندى عمل ايه يعنى حنخش فى قضايا
ورا قضايا لحاد ربنا يعلم امتى يادى الليلة !
اللى موش فايئة !

عبده : أنا كنت فاكرك انتك حتفرح
الضابط : انت بتقول ايه يا عبده ؟ ده تصرف ناس
متحضرين ؟ ده تصرف وحش فى الغابة !
عبده : يمكن .. لكن أنا عندى حكم قضائى نهائى أهه
(يقدم لهم ورقة) يجعل أهل الرصيف دول
أصحاب للعمارة !

عبد السلام : والله لانا واخد عمارتى ولو صرفت آخر ملهم
فى جيبى .. (يفور ثانيا) ولو اقتضى الامر
كفاح قانونى وغير قانونى ..
عبده : ياخوانا كفاح ايه ؟ احنا فى فرح .. فى
المزيكا ؟

(يعود الراقصون والمغنون)
الضابط : لازم حتلاقى ثغرة فى الحكم الجديد ده .. لازم
حتقدر تتصرف

عبد السلام : دلوقتى بس فهمت ..
عبده : على فكرة .. أنا حاكم العمارة من بكرة ..
وحابنى دورين كمان .. وحأجرهم إيجار قديم
.. بخمستاشر جنيه فى الشهر
عبد السلام : سامع يا محمود يا بنى !
(فالج يدخل مترنحاً)

فـالـح : وأنا حاجز شقة فى الدور فوقانى .. على

السطح .. عشان أربى فيها فراخ ويط ووز ..

وأحط معاهم كلب عشان يخوف الحداية !

(يشير ضاحكاً الى عبد السلام)

الضابط : لكن ده مش معقول يا عبده بك !

عبد السلام : ده سفه !

عبده : ليه ؟ عمارتى وأنا حر فيها !

فـالـح : وحأعمل فى ركن السطوح قعدة ملاكى (كلام

يوحى بالحشيش) قعدة كده على مزاجك

يا عبد السلام باشا ! يعنى زى ماتقول قعدة

للجدعان .. وأم زريق حتوضب لزوم القعدة ..

يا خرابى ! حاجة مضمونة لا ييجى ناحيتك

مخبر ولا تطولك عين (يتأرجح بينهم) ..

عين .. عين .. (يترنح) عين .. فضولى ..

(يقع على الأرض)

عبد السلام : شايف يا حضرة الضابط ! الراجل محشش !

(همهمة وغمغمة من الجميع)

أنا أطلب من سيادتك القبض عليه !

الضابط : للأسف ما أقدرش ..

(يقبله الرجال من عثرته)

عبد السلام : ما انتش شايف ؟ دا واقف على رجليه

بالعافية .. ومش سامع بيقول حي عمل ايه فى

عمارتى ؟

الضابط : يا عبد السلام باشا القانون لا يحاسب على

النوايا ..

عبد السلام : ولا على السطل ؟ الراجل مسطول ..

فـالـح : هي فين أم زردق ؟ يام زردق ؟ الحقى جوزك

حيودوه اللومان !

أم عيشة : (تنادى) يام زردق .. يام زردق !

(تدخل أم زردق مع زردق .. وهو

- يغنى)

زردق : (يغنى)

الأوله كانت عمارة الرب حارسها ..

اساس دورين

والثانية طلعت أوت ماحد ساكنها ..

ناقصها بابين

والثالثة تعلّى وتعلّى والحيطان حايرة ..

على طوبتين

يارب تنزل عليها قنبلة تشيها ..

ماتعرف فين

المجموعة : ولاد وبنات يروحوا فين

ماليهم حد

لا ليهم دار تتاويهم

ولا باب سد

عليهم دين معذبهم

ولا له رد

مغنية : بيجو المولى سبحانه
يفيض بالحب سلطانه
يعلى البانى بنيه
تقوم تقوى ولا تنهد
زريق : مالك بوضع اليد خد منها مفاتيحها
وأكملها !

سكن غلابة كثير .. صانعوا مصالحها
وأحوالها
واتجوزوا وخلفوا جابوا عيال ياما
تعرها
علت طوابق طوابق بأحلامها
وأمالها

عبد السلام : انت لازم تقبض عليهم .. كلهم حشاشين ! لا لا
لا .. أخطر من ده كله .. اربابيين ! أيوه
اربابيين ! .. قطاع طرق ! لصووص ! وانت
نفسك شاهد على أنهم وضعوا ايديهم بالقوة
على عقار يخصنى .. عقار ملكى .. ملك
يمينى .. وملك اليمين ..

عبد : ما كنتش عايز مواجهة فى ليلة فرحى يا عبد
السلام بيه .. زى ما انت شايف الناس مسالين
ونايمين على الرصيف .. وحتشوف حالاً تفيدة،
مراتى وهى جايه بتوب الفرح .. وهى بتطلع
عشان تنام معاى هنا .

عبد السلام : الراجل اتجنن يامحمود .. سامع بيقول إيه ؟

(تفييدة - داخللة)

تفييدة : سالاخير عليكو (فى خفر العروس) انتو لا مؤاخذه قدامكو كثير ؟

زريق : احنا جاهزين للزفة يامدام !

تفييدة : احنا بقينا نص الليل !

مصباح : (يقوم بصعوبة) لا مؤاخذه باولاد

الروماتيزم تاغبني .. لا باعرف اتحرك ولا

باعرف أقعد .. اسمحو لى أنا أكوع ..

(يتجه إلى بطانية على الأرض وينام)

أم عيشة : مش حتاكل لقمة يامصباح ؟ دا البوفيه بسم

الله ماشاء الله .. كله لحمه ..

تفييدة : لا والنبي ماتنام من غيرى ماتتعى ..

مصباح : يعنى هو بخطرئ .. والا بخطرئ ؟ !

تفييدة : عشان خاطرئ .. عشان خاطر عيشة ..

مصباح : تصبحوا على خير ..

(ينام)

أم عيشة : اوعى حد يارجاله ينام قبل الزفة .. يالله

يازريق ..

عبد السلام : أنا موش فاهم يا أستاذ عبده .. إذا كان حكم

وضع اليد صدر زي مابتقول .. ليه مصرين

تنفذوا أمر الاخلاء؟

عبده : عشان خاطر محمود بيه ..

عبد السلام : انتى بتهزر معاى يا عبده بيه ؟ أنا لحاد الوقت
ملتزم بالقانون وياتكم كلام قانونى .. وأنا
أعرف إزاي أرد على تصرف قانون الغاب
بتاعكوده .. أنا لى طرق ووسائل تخليكو
تندموا ..

عبده : والله يا عبد السلام بك أنت لو واعى بالموقف ما
كنت قلت الكلام ده .. الخروج عن القانون
أسهل بالنسبة للى ماعندوش حاجة يخاف
عليها .. صدقتى .. أنا أصغر منك بكثير ..
يمكن أد ابنك لكن أعرف أكثر منك بكثير ..
الحاج مصباح ماعندوش الهوا .. وعشان كده
نايم سعيد ! عارف إن ربنا لازم حينصفه ! كل
واحد م اللى أنت شايفهم دول على باب الله ..
والله كريم .. عشان كده بنقول على باب
الكريم.. ده مجتمع كبير انت مش داري بيه ..
كل واحد من اللى بيرقصوا دول وبيغنوا له
قصة .. له عذبة فلسة والا اتلغت م الوجود فى
الصعيد .. كان له أرض راحت .. ايه اللى باقى
له ؟ إيه المستقبل يا عبد السلام بيه ؟ النهارده
دول اتلموا من غير تنظيم ولا ترتيب .. لكن إذا
عرفوا هم عايزين ايه .. مش حتفضل عمارة
واحدة سليمة تحت التشطيط فى مصر ..
عبد السلام : حتعملوا ثورة ! ؟ تمرد ؟ والا انقلاب ؟

الضابط : ده كلام خطير جداً ..
عبده : أنا معاك .. وعشان كده أنا داويت الموقف
بطريقتى ..
عبد السلام : أخليتو العمارة .. ووضعتوا ايد كم عليها ؟
إزاي ؟
عبده : بسيطة .. بص فى ساعتك ..
الضابط : الساعة ؟ دخلها ايه الساعة ؟
عبده : كل حاجة .. يقينا نص الليل ؟ أنا قايل لتفيدة
تيجى لما تلاقى العقربين حضنوا بعض ..
تفيدة : يعنى ميعاد الزفة !
عبده : لأ .. يعنى بكرة .. ميعاد وضع اليد .. نفاذ
حكم وضع اليد !
عبد السلام : يابن القرنديلى ..
عبده : فهمت يامحمود بك .. انت حكمتك انتنفذ ..
واديجنا أهه كلنا بره العمارة ! لكن ده كان
امبارح .. دلوقتى بقينا بكرة .. يالله يارجاله ..
قوم ياعم مصباح .. خد كل الناس وعلى فوق ..
الزفة .. والبوقيه ..
الضابط : وهى ده المفاجأة اللى قلتلى عليها ؟
عبده : لأ .. المفاجأة هى إن عم مصباح أجر لك الدور
الأرضى بخمستاشر جنيه .. مش كده ياعم
مصباح ؟
مصباح : (يفيق من النوم) حنلاقى أحسن منه ؟

عبيده : ومعاه الحوش .. ممكن تزرعه جنينة .. ماشى؟
عبد السلام : أوعى تصدق يامحمود بك .. يامحمود باشا ..
عبيده : وأدى العقد بتاريخ بكرة ..
الضابط : أنا مش مصدق عيني !
عبيده : مفاجأة ياعم والا لا ؟
تفيدة : (تزغرد) والفرح حنعملوه هنا يابيه ؟ وزردق
حيغنى ؟
زردق : حنة كده على الماشى ؟
عبيده : لا أرجوك ! أنا بس صعبان على لما عبد
السلام أفندى يصطدم بالسلطة التنفيذية لأول
مرة فى حياته !
عبد السلام قصدك إيه ياعبد بك !
عبيده : قصدى لما تحاول تطرد محمود بيه هو
ومراته وعياله بالقوة الجبرية !
الضابط : يحاول إيه ؟ (فى غضب) يعنى إيه
الكلام ده ؟
عبيده : مش قتللكم .. زفة العروسة ياجدع !
(موسيقى ورقص واحتمال غناء زردق)
إظلام

مطابع الهيئة المصرية العامة للكتاب

رقم الإيداع بدار الكتب ٨٩١١ / ٩٣

I.S.B.N 977-01-3517-8